

那文毅公奏議

那文毅公三任陝甘總督奏議目錄

卷五十六

恭謝

天恩

附訊柳全璧案

平番全策

卷五十七

平番全策

卷五十八

籌備邊儲

興建義倉

悲恤民瘼

籌濟南河工需

變通徵草處分

卷五十九

朔方水利

請禁新疆私茶

酌定邊防佐貳官制

整飭武備

調劑營伍

斷定蒙古地界

卷六十

分讞諸獄

卷六十一

直陳武選弊端

推薦賢能

糾彈庸劣

那文毅公三任陝甘總督奏議卷五十六目錄

卷五十六

恭謝

天恩

附訊柳全璧案

平番全策

那文毅公三任陝甘總督奏議卷五十六

上海圖書館藏  
陝甘總督奏議

男容安恭輯

恭謝

天恩

附訊柳全璧案

道光二年六月十七日

命署陝西巡撫奉

上諭那彥成著馳驛前往陝西署理巡撫事務並會同  
辛從益審辦柳全璧一案文孚著卽馳驛回京那彥  
成俟程祖洛到任後前赴甘肅署理陝甘總督長齡  
俟那彥成接署後卽來京供職

道光二年七月十六日

奏爲恭報到陝接署撫篆日期叩謝

天恩事竊

臣

於六月二十一日

陛辭後卽於次日束裝起程於七月十五日行抵陝西

省城當經藩司兼護撫

臣

唐仲冕將陝西巡撫關

防委員賁送前來

臣

恭設香案望

闕叩頭祇領伏念

臣

知識樛昧屢獲重愆仰蒙

仁宗睿皇帝棄瑕錄用擢任倉場侍郎復荷

皇上知遇殊恩不以

臣

駑駘之才不堪驅策

特旨晉陞理藩院尙書旋調吏部又調任刑部尙書茲

復仰蒙

諭旨俾署陝西巡撫重任並

命於交卸撫篆後接署陝甘總督篆務凡此

恩施之逾格任愈重而自顧益覺匪才

臣

惟有殫竭丹

誠實心經理不敢以舊任陝甘因熟習而生玩泄

亦不敢以暫時署理稍存五日京兆之心第

臣質

性迂拙深懼才不稱職致辜

委任惟有仰乞

聖慈嚴切教訓開擴愚蒙俾

臣

得所遵循庶幾勉策下

材以冀仰答



高厚鴻慈於萬一謹

奏奉

硃批知道了

道光二年七月十六日

奏查柳全璧一案業經文孚辛從益審明大概情形  
具奏在案茲據沿途稟報鄧廷楨已入陝西境內  
日內即可抵省臣俟鄧廷楨到省後再會同辛從  
益嚴切訊問錄取確實供詞按例定擬具奏至續  
奉

諭旨審辦鄧州民人李芳園京控一案現已劄提人證

俟原被告到齊即可審訊議擬具奏謹

奏奉

硃批知道了

道光二年七月二十六日會同禮部侍郎辛公從  
益

奏爲遵

旨審明渭南縣民柳全璧毆斃人命並承審各員辦理

乖謬分別定擬事竊

臣

辛從益先奉

諭旨同

臣

文孚來陝查辦渭南縣民柳全璧毆斃人命

一案當經查訊承審各員乖謬顛倒並已革知縣

徐澗事後得贓各情審明具奏奉

旨朱勲著解任先行交部嚴加議處卽在陝西省城聽候文孚等傳訊鄧廷楨亦著解任交阿霖派員迅速押赴陝西質訊欽此正在覆訊間文孚回京供職

那彥成奉

命來陝會同

臣

辛從益審辦連日覆審無異旋於七月

十六日據江西按察使史譜委員將藩司鄧廷楨押解來陝

臣

等將鄧廷楨承審乖謬各情開寫問條反覆究詰據鄧廷楨逐條登覆自認誤信原驗

拘泥例文以致未能及早開檢實屬福薄災生冒

庸執謬辜負

天恩斷不敢聽受賄囑及受人指使各情臣等復就鄧廷楨所供嚴加駁詰鄧廷楨惟自認糊塗無可置辯其愧悔畏懼見於辭色臣等查叅摺內有柳姓億萬家貲盡蕩然於當道之手之語此乃案內緊要情節如果屬實則該承審大小官員必多得受重賄斷不止徐潤一人亟當查明由此根究不使墨吏一人倖免隨訊據柳全璧堂兄柳全玉供稱伊故父與柳全璧故父係同胞弟兄同居共村柳全璧之父生柳全璧柳全璽二人伊家素不種地

惟賴當典賢生伊父叔等先與張姓合開當典六座二十一年與張姓分夥伊家分得典當四座其本銀八萬有零伊故父係長房分一股四萬兩有零柳全璧故父係二房分一股四萬兩有零嗣柳全璧柳全璧又復派分柳全璧計分銀二萬七百兩現在當典仍照舊開設據將伊兄弟分單並與張姓分夥議單一併呈閱請查質之屍堂叔朱大榮亦稱柳全璧等典當四座仍舊開設並未關閉

臣那彥成復先後遴派因公在省之咸陽縣知縣吳鳴捷寶鷄縣知縣劉川霖遊擊劉鳳翥千總馬

承勲等聞日分起密至渭南縣查訪俱與所供大概相同研訊柳全璧據稱伊自二十三年涉訟以來共用過銀五千餘兩除賄囑原驗官吏並酬謝徐潤之外餘銀二千兩實係犯案五年來京盤費飯食零星用度我弟兄三人夥開店業不能一人獨用至我已花錢仍不能免罪萬不肯再代各官諱匿等語加以刑嚇柳全璧堅供不移臣等隨提齊犯証逐加研訊緣柳全璧籍隸渭南與已死朱錫林素好無嫌朱錫林先係柳全璧當典夥計舊欠柳全璧會銀一百二十六兩未還嘉慶二十三

年四月柳全璧向朱錫林索討朱錫林推緩九月十五日柳全璧在大荔縣典史衙門追控斷限朱錫林十日交還十月二十三日朱錫林至柳全璧家斥其不應控追與柳全璧工人張佩德互罵揪扭柳全璧喝令工人李二並柳全玉工人王九九子毆打聲言打至驢下有伊承當王九九子順取割草鐮刀連砍朱錫林顙門二下倒地不動張佩德疑其裝死詐賴又用鐮刀砍其腦後一下隨看明朱錫林業已殞命俱各畏懼張佩德起意裝點自殘後自縊身死隨用小刀在朱錫林頂心等處

迭晝二十八處用繩繫在前門鎖上將鐮刀放於屍旁閉門入內鄰人柳全忠出視告知鄉約赴渭南縣具報該縣徐潤因公赴省縣丞朱有剛前往代驗柳全璧托伊妻父陳登高轉托素識之雷超交給銀三百六十兩向衙門官吏囑托雷超面見朱有剛並件作差役說允朱有剛等遂驗爲自殘後自縊身死填格飭殮雷超分送朱有剛銀一百兩刑書趙馨件作辛成各七十兩原差馬洪泰一百兩禹彪二十兩此柳全璧喝令毆斃朱錫林並賄囑原驗官吏之原委也維時屍妻朱嚴氏免求



屍母舅馬幅讓作抱赴前撫朱勲衙門控告批府  
委員沈琮會審十月初間徐潤回縣柳全璧聞屍  
親上控懼于刑訊卽免陳登高轉托雷超向徐潤  
求情囑爲照應雷超隨面見徐潤聲言朱錫林死  
由自盡與柳全璧無干懇推情照應不要難爲轉  
托等語徐潤回稱若可爲力必當照應並以若非  
柳全璧打死卽可無虞之言答覆嗣徐潤沈琮會  
審屢次兩造各執一詞徐潤等卽取具馬幅讓毆  
斃甘結於十二月間連銜稟准臬司開檢旋因封  
篆將人証保釋二十四年開篆後徐潤票傳人証

定期會檢馬幅讓以朱嚴氏分娩期近結請暫緩  
徐潤旋往甘肅解餉三月回任四月間徐潤以屍  
親均在大荔縣稟請陞任西安府鄧廷楨轉稟臬  
司添委大荔縣鮑珊會檢鄧廷楨信覆未准徐潤  
復差馬洪泰往查朱嚴氏曾否分娩彌月適值朱  
嚴氏於四月十二日產生一女馬洪泰並未查明  
於十五日令原保張樹德前往傳喚朱嚴氏下床  
回覆受風身死屍堂叔朱大信赴前撫朱勲衙門  
控告批司開檢究辦飭委鄧廷楨提省檢訊鄧廷  
楨委候補知縣姚治訊供姚治以原驗本係自殘

後自縊身死例內又載有自縊自殘之案究問明確不得一概開檢之語當令朱大信出具切結開檢朱大信因相驗時本未到場馬幅讓雖眼同相驗又年老眼昏不能指定傷痕部位姚治以朱大信供詞狡展當加掌責十五下諭以既不出開檢切結卽當出具悔結朱大信畏刑遂與馬幅讓出具悞聽人言不敢誣執切結鄧廷楨知屍親已具悔結可免屍遭蒸檢之慘屍親又免坐誣卽剖飭徐潤補報並信知徐潤可以將就了結毋庸開檢徐潤卽照原驗通報鄧廷楨並將朱大信先控後

悔各情具詳經前撫朱勲以控關人命何能任其  
起滅自由批駁飭司委審鄧廷楨覆訊朱大信等  
並無翻異卽照原案詳覆由已故臬司特通阿轉  
詳前撫朱勲批結九月間柳全璧案結回家雷超  
卽向陳登高談及徐潤審辦此案甚爲用情欲令  
柳全璧酬謝徐潤銀二千兩柳全璧因徐潤屢次  
審訊未加刑責又雷超之言難以回却隨如數措  
銀二千兩自交雷超轉送徐潤作爲酬謝徐潤亦  
卽收受是年十一月屍堂兄朱錫金聞知不服卽  
以朱錫林被毆斃命姚治刑逼悔結等詞赴陝甘

督臣衙門具控批司仍飭陞守鄧廷楨審訊於二十五年三月間提齊人証時柳全玉以屍堂叔朱大榮亦係伊家舊夥曾欠銀二千兩挾有訟嫌卽於舊夥趙善魁通問信內仿照筆跡添註朱大榮前欠銀二千兩讓了便可和事語句令柳全璧呈案指爲屍親訛詐的據鄧廷楨以案有可疑隨督同委員候補知縣黃寶審訊一次朱錫金亦不能指定傷痕黃寶前赴南鄭縣任鄧廷楨親訊數次朱錫金供情游移至五月初間朱錫金患病取保十八日病故鄧廷楨卽將案卷發交長安縣陳元

煦審訊維時姚洽在縣署幫審案件鄧廷楨未令迴避六月初三日姚洽提訊以馬幅讓屢作見証疑有教唆向其詰問馬幅讓頂撞姚洽掌責馬幅讓十五下次日患病取保至初五日馬幅讓在保身故經陞任咸寧縣沈琮驗係病斃取結存卷維時屍親相繼病故柳全璧復央同村鄭文傑作爲証見令其到案捏說是日曾撞見朱錫林頭顱帶傷前往柳家許將欠銀十兩讓去鄭文傑應允經陳元煦節次提訊柳全璧堅供朱錫林被傷有據朱大榮藉屍訛詐等情陳元煦以屍親質証無人

詳請查提朱大榮等到省再行確訊由邵廷楨轉  
詳署臬司胡彬愚核轉詳經督臣長齡前撫臣朱  
勲批准此又承審各員錯謬顛倒並徐潤事後得  
賊之實在情形也道光元年朱錫金之子朱大赴  
京在都察院呈控奏奉

諭旨交陞任陝甘總督長齡審辦長齡飭委甘涼道張  
本枝來陝檢明朱錫林屍身實係被毆斃命並非  
自縊將人犯帶回甘肅審訊柳全璧僅將喝令毆  
打賄囑原驗官吏各情據實供吐而於徐潤事後  
得賊仍狡不吐實朱有剛旋即病故經長齡審擬

奏結臣等欽奉

諭旨提訊之下據各供認前情不諱臣等以徐潤所供  
事後得贓恐係避重就輕並恐鄧廷楨與徐潤姚  
洽有私相授意顛預了結情事隨提徐潤姚洽隔  
別研訊據徐潤供稱二十三年十月雷超代柳全  
璧只係求情並未提及賄賂我因原驗係自縊身  
死是以隨口答應我若受賄在先何肯兩次稟請  
開檢自取敗露只求詳情至鄧廷楨承審此案從  
未露有私心不敢平空妄說等語據姚洽供稱委  
伊審案之時原談論案情例意有開檢應須慎重



之語並未授意令我逼取屍親悔結至我掌責屍親實止十五下究係性情癡率如今愧悔無及等語覆訊柳全璧柳全玉柳全璽僉供伊等俱係渭南縣民縣城官吏全仗雷超關說至省城大小官員素不謀面實在無門可入委無賄囑請托情事加以刑嚇矢口不移自應按例擬結查律載威力主使毆打至死者爲首絞監後又例載有事以財行求及說事過錢者與受財人同科無祿人減一等又律載諸色人等曲法囑托公事已施行杖一百官吏以故出入人罪論又律載官司故出入人罪

全出者以全罪論若失於出者各減五等以吏典  
爲首首領官減吏典一等若放而還獲故出失出  
各聽減一等又律載凡官吏有事先不許財過後  
受財事若枉斷者准枉法論註云不言出錢過錢  
人之罪問不應從重可也又名例載凡律稱准者  
罪止杖一百流三千里各等語此案柳全壁喝令  
毆傷朱錫林身死先據陝甘督臣訊明柳全壁因  
朱錫林嗔伊控追欠銀登門尋鬧喝令工人王九  
九子用鑊刀將其砍傷致斃除以財行求串捏干  
証係輕罪不議外將該犯依律擬絞在案茲臣等

復經審出該犯先托雷超向徐潤求情事後酬謝  
徐潤銀二千兩按律祇問不應罪止杖責自應依  
律從重問擬柳全璧應仍依該督原擬合依威力  
主使毆打致死者以主使之人爲首絞監候律擬  
絞監候秋後處決事犯在嘉慶二十五年八月二  
十七日

恩詔以前先經刑部奏明不准援免入於秋審緩決辦  
理查該犯毆斃人命恃富賄囑官吏捏報自縊又  
誣坐屍親訛詐致屍親屢控承審各官受其欺朦  
現已均獲重咎自應從嚴懲辦以端民風柳全璧

應改入秋審情實辦理雷超代柳全璧賄囑原驗  
官吏送給朱有剛枉法贓銀一百兩經該督審將  
該犯照例擬流臣等復經訊出該犯先代柳全璧  
向徐潤囑托照應事後復代柳全璧送銀酬謝按  
囑托公事及事後過錢各律罪止杖責自應從重  
定擬雷超應仍照該督原擬合依說事過錢與受  
財人同科無祿人減一等例於已故朱有剛絞罪  
上減一等杖一百流三千里事犯亦在

大赦以前先經刑部擬准援免惟該犯出入衙門包攬  
詞訟以致釀成巨案應不准其援免卽定地發配

折責安置已革渭南縣知縣徐潤於承審命案先  
受雷超囑托卽未嚴訊正兇嗣因屍親在府出具  
悔結經該府鄧廷楨飭知該革員亦卽就案詳結  
事後得受柳全璧酬謝銀二千兩查該革員旣經  
聽囑在先其疎脫正兇卽屬故出按故出人罪放  
而還獲律應於柳全璧絞罪上減等擬流其事後  
得受贓銀二千兩按准枉法律亦應滿流二罪相  
等從一科斷徐潤合依官吏事後得財事若枉者  
准枉法論罪止杖一百流三千里律擬杖一百流  
三千里仍請

旨加重發往伊犁充當苦差卽日起解不准停留所得  
贓銀仍在該革員家屬名下追出入官已革候補  
知縣姚治因屍親朱大信等不能確指傷痕部位  
先後掌責朱大信馬幅讓並勒取朱大信等悔結  
以致案未開檢疎脫正兇現訊該革員並非聽受  
賄囑有心徇縱自未便照故出律擬以滿流而該  
革員躁妄戾暴率將屍親疊次掌責又未便僅照  
失出絞律擬以滿杖致滋輕縱例無治罪明文應  
卽依律加等定擬姚治合於失出絞罪減五等首  
領官減吏典一等放而還獲各聽減一等罪止杖

一百律上加一等擬杖六十徒一年到配折責安置前任西安府知府陞任江西藩司鄧廷楨於知府任內承審命案不肯卽行開檢迨經巡撫批駁仍執原議頂詳嗣屍親朱錫金復控該陞守仍延未開檢又不令姚治迴避致馬幅讓復遭掌責研訊該陞守實由誤信屍格拘泥例文卽其寄徐潤信函有將就了結之語訊明該陞守實係措詞失當如別有情弊斷不肯形諸紙筆授人以柄等語研訊通案人証亦僉供該陞守並無聽囑得贓情事惟該陞守身任方面於所屬命案不能悉心審

辦及早開檢據供慮及屍遭蒸刷屍親又須坐誣  
意存姑息是該陞守以婦寺之仁而幾成不自之  
冤謬執已見種種昏庸僅擬褫革尙覺情浮於法  
現任江西藩司鄧廷楨應請

旨卽行革職發往軍臺効力贖罪查徐潤姚洽鄧廷楨  
事犯俱在

大赦以前徐潤聽囑故縱賊私累累姚洽掌責屍親逼  
取悔結情節俱重應請不准援免鄧廷楨訊無貪  
酷重情其誤信原驗實屬書生之見拘文章義偏  
執枉縱平日官聲尙好可否免其發往軍臺之處



恭候

欽定刑忤差役及餘犯王九九子等業經該督各照律  
例擬以遣流徒杖並經部議准免不准免分別發  
配釋放現訊罪名並無出入無庸再議前任陝甘  
巡撫朱勲現訊通案人証僉供並無徇縱別情業  
經奉

旨先行交部嚴加議處仍恭候

諭旨欽遵辦理陞任陝甘督

臣

長齡於奉

旨交審之案業將柳全璧喝令毆斃人命並賄囑原驗  
官吏各情審出據實平反惟於徐潤事後得贓未

能審出仍有應得處分應請

旨將長齡交部議處至此案先係鄧廷楨以朱錫林實  
係自縊身死毋庸開檢具詳經巡撫批駁鄧廷楨  
仍照原議頂詳由臬司特通阿審轉迨朱錫金復  
控鄧廷楨委長安縣陳元煦審辦詳請行提朱大  
榮等到案再行確訊由告病鳳邠道胡枝蕙覈轉  
查臬司特通阿業已病故陳元煦訊止不能審出  
實情查無別故業經該督將陳元煦胡枝蕙均奏  
請交部分別議處在案應免再議知縣王賓止隨  
同鄧廷楨審訊一次應免置議全案供招咨部謹

奏

道光二年八月初六日奉

上諭那彥成等奏審明渭南縣民柳全璧毆斃人命承  
審各員辦理乖謬分別定擬一摺此案已革渭南縣  
知縣徐潤於承審時受人囑托就案詳結以致疎脫  
遷就事後得受酬謝贓銀實屬故出人罪著加枷號  
兩個月滿日發往伊犁充當苦差以示懲儆已革候  
補知縣姚治雖無聽受賄囑情事惟率將屍親迭次  
掌責殊屬躁妄著加等問擬杖徒解任江西藩司鄧  
廷楨前在西安府知府任內於所屬命案不能悉心

審辦並恐屍遭蒸刷拘泥例文堅不開檢偏執枉縱  
但訊無貪酷重情著卽行革職加恩免其發往軍臺  
前任陝西巡撫朱勲於屬員勒取悔結審斷乖謬漫  
無覺察咎實難辭前經部議革職姑念其尙無徇縱  
別情著加恩以四五品京堂來京候補長齡審辦此  
案據實平反惟未能審出徐潤事後得贓實情著交  
部議處餘著刑部核議具奏

道光二年七月二十日軍機大臣字寄奉

上諭前有旨諭令那彥成署理陝西巡撫俟新任巡撫  
到任後前赴甘肅署理陝甘總督現在程國仁補放

陝西巡撫到任尙需時日程國仁未到任以前仍著  
那彥成署理已降旨令長齡暫緩起程那彥成卽在  
陝西候旨遵行可也

道光二年八月三十日

命署陝甘總督

道光二年九月十八日

奏爲恭報臣接署督篆日期叩謝

天恩事竊臣於九月十五日在西寧郡城接准軍機處

咨道光二年八月三十日奉

上諭長齡著來京供職陝甘總督著那彥成署理欽此

大學士長齡亦經接准咨文隨經委員將陝甘總督關防並

王命旗牌於九月十八日賫送到來

臣

恭設香案望

闕叩頭祇領伏念

臣

賦質愚魯從前歷經外任屢獲

愆尤返復自思罪皆自取實由才非其任五夜警心至今凜凜茲復蒙

聖主特達深仁不以

臣

爲駑駘無用

簡署陝甘總督聞

命之下惶悚交併現當西寧有事

臣

不敢少有推卸惟

當夙夜圖維竭盡犬馬之力思輯邊徼仰酬

委任之恩至於甘省地瘠民貧地方一切事件動形竭  
蹙惟有實心實力認真整飭儻有必須權宜辦理  
之處亦必據實具奏仰祈

指示第<sub>臣</sub>知識短淺疎忽舛誤時刻不免仍求

皇上逾格恩施嚴加

訓迪使<sub>臣</sub>得知所率循庶可勉無隕越謹

奏奉

硃批所奏俱悉自謂知識短淺疎忽舛誤未免過當卿  
受

皇考屢次訓迪深恩刻不可忘惟思一力奉公爲國宣猷

從前不逮之處全行湔洗卿之敢於任事不與世俗  
浮沈朕所素知勛卿者所謂不自大其事不自尙其  
功高明柔克永矢毋忽以期常承恩眷佐朕以治也  
稟之慎之

道光二年十月初八日

擢授陝甘總督

道光二年十月二十七日

奏爲恭謝

天恩事竊臣接准軍機處咨開道光二年十月初八日  
奉



上諭那彥成著實授陝甘總督刑部尙書著蔣攸銛補授欽此臣聞

命之下感悚交并伏思臣知識短淺性情急躁從前屢經外任皆獲重愆仰蒙

皇上特達深恩棄瑕錄用由倉場侍郎陞任尙書又調任刑部繁缺本年屢奉

恩旨先後署理陝西巡撫陝甘總督印務臣勉竭駑駘猶冀受代有人即可回京供職獲聆

訓迪之殷益遂就瞻之願茲復欽承

異命實授陝甘總督適有番案臣何敢諉卸惟有實心

實力整頓地方仍常川來往西寧務須籌出萬全  
先將漢奸回民熟番蒙古倣賊之人訪拏並內地  
歇家私販嚴禁查拏斷絕河北賊番糧茶內線既  
斷則番帳自易驅逐將來若辦至野番與蒙古一  
律請票買糧則事機順利可得把握第臣賦材既  
下氣質又偏隨事隨時但加自省莫非愆尤惟有  
仰求

皇上遇事指示使臣刻凜冰兢庶可勉無隕越至臣六  
馬戀主之誠夙夜寢興無時可釋現奉

恩旨將武隆阿補授西寧辦事大臣查武隆阿氣質深

沉暢曉機務仰見我

皇上任人器使均非臣下愚昧思慮之所能到感佩莫  
可名言又現任西寧鎮總兵穆蘭岱樸誠可信邊  
務極其用心學習數年亦甚可用臣得與二人會  
商籌辦幸得仰仗

聖主福庇或可不至用兵竟能辦有成效仍求

逾格鴻慈另行簡員接任督篆俯准臣回京

賞給差使俾得趨覲

天顏常聆

訓誨則頂沐

恩施益無涯涘謹

奏奉

硃批所奏均悉虛心實行四字乃朕自勵者也特書與卿時加省察毋忽

道光二年十月二十七日

奏臣正在封摺間接奉前署陝甘督篆恭謝

天恩

批摺仰蒙

皇上訓示周詳獎勵微長而勉所不及跪讀之下欽感

難名臣惟有勤慎小心痛自湔洗謙卑遜順不敢

尙氣不敢矜長仍將奉到

硃諭敬錄一通朝夕跪誦時自循省如凜

天威於咫尺謹

奏奉

硃批知道了

道光二年十二月二十七日

奏爲恭謝

天恩事竊

臣

接到家信敬悉

特恩欽賞庫中軍器刀鎗長矛共六件給摺弁帶回自

聞

恩命倍切悚惶至於十二月十九日摺弁旋甘賚到惶

中<sub>臣</sub>率屬出郊祇迓恭設香案望

闕碰頭跪領訖伏惟我

皇上宏謨遠播

神武懋昭瞻

舜羽於兩階寶區服教仰

軒弧於九陛億兆歸仁迺荷

君恩特彰<sub>臣</sub>寵方拜琕弓戎矢

錫自

天闔可期青海雪山威揚荒服<sub>臣</sub>惟有珍藏武庫願四

方共慶恬熙敬守戎經俾千載永揚

鴻鑠謹

奏奉

硃批知道了所以頒賜軍器者示卿以耆定輯武我君  
臣共享承平之福也

道光二年十二月三十日長子容安蒙

恩命在

乾清門行走

道光三年正月二十六日

奏爲恭謝

天恩事竊

臣

於正月二十五日接到家信知

臣

長子容

安仰蒙

特旨挑在

乾清門行走聞

命之下感激難名伏念

臣

渥沐

聖慈畀以陝甘總督連圻重任報稱毫無清夜思維正

深悚愧

臣

次子容照已蒙

恩在

乾清門行走茲長子容安復邀

特恩簡入



禁鎮當差父子兄弟仰沐

稠疊隆施有加無已世受

國恩雖捐糜頂踵難報効於涓埃

臣惟有於地方應

辦事宜殫竭血誠實力妥辦邊陲機務刻刻留心  
以期無悞務求邊徼乂安民恬物阜至

臣兩子魯

鈍年輕諸凡未諳當隨時寄信教其勤慎當差勉

圖上進以冀稍副

高厚鴻慈於萬一謹

奏奉

硃批知道了

道光三年二月初一日 文成公蒙

恩配饗

太廟

道光三年二月二十五日

奏爲恭謝

天恩事竊臣於二月二十二日摺差回省接閱家信恭

閱本年二月初一日奉

上諭國家定制諸臣中有勤於王事功在社稷者列入  
祀典用示酬勛其超衆宣勞之王大臣並有配饗之  
例本朝開國功臣王大臣等俱配饗

太廟雍正年間怡賢親王大學士鄂爾泰張廷玉皆循此  
例乾隆年間增入超勇親王策凌嘉慶年間增入大  
學士傅恒協辦大學士尙書兆惠大學士福康安甚  
盛典也朕思原任大學士公阿桂乾隆年間仰蒙

皇祖高宗純皇帝簡擢平定西陲旋經理新疆事務妥協  
周詳著有成效嗣勦辦大小金川畀以將軍重任秉  
承

方畧堅持定見克蕲膚功又勦捕撒拉爾及石峯堡回匪  
立就殄平圖形紫光閣者四次入任綸扉管理部務  
贊襄樞要二十餘年其間奉使讞獄修築河隄捍禦

海塘懋績丕著綜其生平端謹持躬公忠體國有古  
大臣之風嘉慶年間業經特沛

殊恩

賜諡文成並入祀賢良祠飾終之典備極寵榮朕倦懷耆  
舊軫念功勲宜崇追配之儀用副酬庸之典阿桂著  
配饗

太廟以示朕崇獎盡臣至意該部察例卽行欽此臣跪讀  
之下如在夢寐之中

恩出意想之外感激涕零不知所云伏念臣祖阿桂蒙  
高宗純皇帝知遇之恩屢膺重任仰承

廟算所事克成爵拜上公職居端揆嗣於嘉慶二年病故

渥承

寵貺備極哀榮迨嘉慶十八年

仁宗睿皇帝以滑縣事竣仍復

眷念先臣

特恩賜祭一壇茲復仰蒙

皇上軫念舊勛

特加美報俾

臣祖親

列聖之裳衣饗千秋之俎豆此實

臣

生生世世子子孫孫

銜感難名捐糜莫報敬憶

臣

少時蒙

高宗純皇帝召見諭以朕封汝祖公爵以誠謀英勇爲號  
特以汝祖生平於朕前真誠樸實從不作一妄語故封  
爵冠以誠字汝當學之欽此臣維時跪聆  
天訓夙夜兢兢卽矢念於生平不敢有忘嗣蒙

仁宗睿皇帝亦屢以勉學乃祖諄諄

訓誨今臣祖仰承

曠典

臣復職任連圻自顧經濟猷爲萬萬不及臣祖百

分之一而犬馬駑駘惟有愚誠無妄早晚時加省

察儻有一念虛僞非特不可爲滿洲臣僕亦並不

可爲先人之後嗣以後遇事益當殫竭惻忱實心

勉力以至誠仰答

君父卽以無欺對越祖宗惟有仰求

皇上鴻慈嚴切

訓誨俾

臣愚昧無能得以少効驅策仰報

高厚殊恩於萬一至

臣一聞

恩命自應星夜入都匍匐

闕廷泥首叩謝惟番案甫經完竣尙需料理善後四

五月間應辦本省奏銷秋審合無仰懇

天恩可否准令

臣

於秋間進京

陛見叩謝

天恩之處仰祈

指示所有

臣

感激下忱謹先繕摺專差家丁賁奏叩謝

隆施謹

奏奉

硃批所奏謝知道了嗣後倍當黽勉夙夜無忘忠誠二字永遠宣力國家佐朕治理以副朕之厚望下及子子孫孫務期克紹家聲受祿無窮其慎勉之無庸爲此來京叩謝

道光三年三月初三日奉

上諭禮部奏原任大學士公阿桂配饗



太廟位次朕思追配之文本示酬庸之典其安設牌位自應以服官先後爲序兆惠雍正年間卽已筮仕傅恒阿桂均係乾隆初年服官福康安係乾隆三十二年始行供職所有配饗西廡牌位傅恒著列於兆惠之次阿桂著列於傅恒之次福康安著列於阿桂之次

道光三年三月十二日奉

上諭那彥成等奏編查番族戶口完竣青海各旗蒙古俱已復業一摺循化貴德野番佔踞河北搶劫蒙古已歷數年那彥成此次督飭文武員弁嚴禁糧茶搜拏漢奸不煩兵力致野番畏懼全數移居河南辦理

甚爲妥速那彥成著交部議敘

道光三年三月二十三日禮部遵例奏請

欽派三品以上大員捧牌入

廟奉

旨原任大學士公阿桂配饗

太廟西廡於四月初一日安設牌著派阿桂曾孫乾清門  
侍衛子爵容安捧往安設

道光三年四月十五日次子容照蒙

恩擢爲頭等侍衛向茶正

奏爲恭謝

天恩事竊<sub>臣</sub>前奏番案告嚴邊境又安一摺於三月二

十五日欽奉

恩旨那彥成著交部議敘欽此跪讀之下感激難名伏

念<sub>臣</sub>以庸愚忝居職守仰蒙

皇上特達之恩一二年間不惟<sub>臣</sub>身沐

深仁厚澤由倉場侍郎擢用吏刑兩部尙書旋又畀以總

督重任且蒙

逾格天恩

賞延於世長子容安挑在

乾清門行走次子容照以三寺侍衛超陞頭等侍衛

尙茶正父子兄弟渥受

殊恩已屬夢想所不到更有堪虞所弗克酬者仰蒙

皇上眷念故舊之臣將臣祖阿桂配饗

太廟曠世之

優典實爲臣僕所難逢臣正不知如何竭盡血誠方能

稍報

高厚之鴻慈今以青海野番佔踞河北一案上賴

皇上聖德天威下藉文武屬員敬事幸得野番移歸河

南蒙古安業河北雖能肅清於一時終貴保安於

久遠臣方日深惕息多慚未能周詳至當乃蒙

聖主格外

恩施將臣交部議敘止於驅逐番帳之微勞亦有善而必錄本職分應辦之事重邀

天語褒嘉實不勝愧感悚惶之至臣以後惟有事無鉅

細實力實心刻以忠誠二字自矢因感荷發於中心乃循躬深其省察始悔從前之血氣自負聰明自用或有時而存自便自私之心或臨事而有意懈疎懶之念與夫見長討好沽名好勝是乃自欺自利之曲見卽思得患失之私衷卽如臣才力本不勝連圻重寄去夏蒙署陝甘總督之

命原思無論在外在內均應宣力

國家

陛辭時遽爾冒昧陳情乞

恩內用雖情緣於犬馬戀

主而究係避就縈心卽此已大非篤秉事

君之道反復自思衺影豈能無慚凡此一念一事之私  
皆不可以仰對

君父卽不可以爲人賢子孫行年六十方知五十九年  
之非猶有待於

天恩之感召乃能曠發其顓蒙見之已遲止求亟亟於

晚蓋臣並將此奏稿隨後卽寄信諭令臣之子容

安等熟讀力行共矢忠誠益加奮勉以期世世子

孫永篤忠誠沐

聖主之厚恩延世澤於無已臣淪肌浹髓感激無任期

達愚誠語非倫次謹

奏奉

硃批嗣後事事倍當奮勉以期永承恩眷在卿則有光  
於前人在朕則不失知人之明實有厚望焉所奏具  
見丹忱知道了

道光三年九月十一日長子容安奉

命恭賚

御賜匾額等件前赴甘肅

賜壽

道光三年十一月初一日

奏爲恭謝

天恩事竊臣仰荷

主恩高厚以十一月十六日係臣六十生辰

特命長子容安賚捧

御書亮助集祐匾額並福壽字各一張佛像如意朝珠

蟒服錦緞江綢陳設等物



恩賞到甘

臣

當卽出郊跪迎恭設香案望

闕叩頭祇領訖伏念

臣

世受

國恩屢邀

寵眷追配則祖叨

曠典洊階則子被

殊褒且以

臣

籌辦野番

施恩議敘一門感戴五夜悚惶何期周甲之年復拜

重申之錫勤勞未著偏瞻

宸藻輝煌精力尙強悉荷

天工長養佛篆光騰寶意袞華色映牟尼章身胥組織

之文耀目乃琳琅之彩長子容安親承

君命趨視臣闡陳

聖主之深恩話天倫之樂事

優崇逾格頂踵難酬

臣

渥被

鴻慈益加驚勵捧

鸞書而忭舞洵未有之遭逢顧馬齒以增榮實莫名夫

感悃謹恭摺叩謝

天恩謹

奏奉

硃批所奏均悉但望卿長此福壽日增身體康強永永

爲國宣力也不勝喜悅

平番全策

道光二年八月初九日軍機大臣字寄奉

上諭那清安等奏兵部當月司員付送新疆文移等項  
於巴里坤黃布口袋內拆出匿名揭帖一紙並未粘  
封謹將原帖呈覽一摺據揭帖內稱陝甘總督長齡  
等查辦青海番賊一案甫經凱撤官兵旋有賊番復  
出約二千餘人分作四股肆行劫掠該管大員並不  
派兵堵剿等語青海番賊滋事前派令長齡齊慎前  
往查辦旋據奏報帶兵剿除黃河以北全就肅清並  
移住富強蒙古番子以資防守籌議善後章程八條

俱照所請行茲復有字識匿名揭帖其所稱賊番肆掠情形有滋擾日月及經過地方並搶劫馬牛羊數目如果屬實是長齡等前此奏報肅清盡爲虛捏殊出情理之外但揭帖內究係一面之詞亦難遽信那彥成接奉諭旨著卽馳驛前赴西寧嚴密確查據實具奏此事關係邊疆重務不可稍有瞻徇隱飾況營馬搶去三百餘匹之多必不能掩人耳目原揭帖一件發交那彥成閱看並於該處營汛內查訪字識係何人造寫一經訪有端倪卽拏獲到案比對筆跡務得確實以憑根究至陝西巡撫印務著交唐仲冕暫

行護理廬坤現已補授廣西巡撫著卽赴陝西署理  
巡撫印務俟程國仁到任後再行交卸起程來京請  
訓再前據長齡等奏助勒蓋一帶卽令察漢諾們罕  
移居克克烏蘇一帶飭回阿里克大百戶住牧均各  
給予執照並於冬春季賞給該諾們罕及阿里克  
大百戶置備口糧銀各一千兩已降旨依議行矣朕  
近聞河北蒙古二十五旗內該察漢諾們罕較爲富  
強其在游牧處所往往首鼠兩端當大兵經臨之時  
卽督率番旗依附官弁及大兵撤退之後仍復勾結  
野番乘間搶劫實屬不安本分那彥成於青海情形

較爲熟悉著一併密行訪察該諾們罕旗下現在有  
無勾結之處查明設法妥爲安置務令安居游牧邊  
圉靖謐方爲妥善

道光二年八月二十日

奏爲遵

旨前赴西寧查辦番案先行覆奏事竊臣於八月十七

日欽奉

諭旨令臣前赴西寧確查匿名揭帖所稱賊番肆掠情

形並令將察漢諾們罕妥爲安置臣當將陝西巡

撫關防委員費交藩司唐仲冕暫行護理一面束

幾趕速起程臣伏查野番分族而居每族不過數百或百十人其能爲賊者每族亦不過十之一二尋常卽互相搶竊彼此素不相和臣前在西寧從未聞野番聚衆百人搶掠之案迨近年以來聞野番哨聚肆掠牲畜或數百人或千人以上不等細加查訪其中旣多漢奸而蒙古之貧窮者亦隨之謀食是以人數滋多惟賊番等烏聚獸散一聞大兵雲集卽紛紛竄匿深山而黃河以北南山之下東西千里南北亦數百里不等窮谷深山竟難必搜捕淨盡大兵一經凱撤未盡餘匪又復潛出搶



殊

掠若云計出萬全邊境又安實不敢易言至察漢  
諾們罕卽係白佛僧亦卽蒙古二十五旗之一現  
在各旗蒙古俱已貧窮該諾們罕若非勾結野番  
分贓窩賊則應早被野番搶劫斷不能獨稱富強  
查該諾們罕原牧在循化邊外後於嘉慶二年經  
策拔克奏准移居黃河之南窩賊引路因此番案  
之多實生於此今又潛住河北爲奸更便但此時  
移之則驅而爲賊留之則引賊作賊如何辦理方  
爲妥善容臣至彼細心訪聞籌畫再爲奏辦又匿  
名揭帖內所稱四股賊番搶劫之案且有日月及

經過地方無難確查虛實如果地方員弁明知匿  
報則將該員弁嚴叅示懲若地方曾經稟報而前  
督臣長齡未經嚴辦則長齡咎無可辭事關邊疆  
重務斷不敢稍涉瞻徇臣出京以來卽將西寧野  
番情形常自臆度抵陝後相距益近於曾在番地  
回任員弁之內留心試探所稱亦大畧相同查野  
番各族原以黃河爲界今野番闖入河北肆行搶  
掠自非大加懲創不足使之畏懾惟野番搶掠祇  
爲謀食先搶蒙古蒙古無可搶乃及內地不過鼠  
竊狗偷萬不值張皇剿辦致糜帑項且計臣馳抵

硃

西寧已交九月正在大雪封山之際亦未便議剿

剿下只好如此辦理

再四籌度惟有嚴飭各提鎮查明各卡隘山口視要隘之大小定兵數之多寡口糧柴薪照例支給亦不致於糜費派令副將等官帶兵分紮駐守仍令各提鎮來往會巡嚴密稽查如有野番闖入內地搶掠由何卡隘偷過卽將防卡將弁嚴行叅辦如果野番行近某卡不必重在接仗但須奪其牛羊絕其口食不期自潰至野番搶得牲畜什物帶交漢奸潛赴西寧貴德循化或甘涼等屬偷出口隘銷賣易換茶葉火藥今各隘口派有防守卽就

便盤查一有漢奸代爲銷贓無難立破一面嚴劄

禁止商民出口如有私販茶葉火藥卽嚴審究辦

是野番缺少茶葉無以爲生而火藥一斷更無所

其精力而行毋負委任

施其伎倆如此以防爲勦不過半年卽足制其生

命况野番等本係烏合素無頭目賞罰一經受苦

必不能耐久計至明年春夏之間當有窮蹙而生

內變者屆時

臣

察看情形如果必須進勦再行厚

集兵力痛加勦辦斷不敢因惜小費畏難苟安若

野番窮蹙畏懼過河遠遁亦斷不敢勞師費財意

涉貪功但

臣

離青海之任十有餘年臆度情形未

敢自信統俟馳抵西寧後實在如何情形再行具奏恭請

訓示至齊慎原止領隊進止機宜均聽長齡調度例不與聞合併聲明再臣會同辛從益查辦各案業已完竣辛從益亦因各河水勢驟長在省待渡臣於二十日亦卽起身趕赴西寧所有隨帶刑部郎中鄒錫淳仍隨臣一併馳驛前往辦事謹

奏

道光二年八月二十九日軍機大臣字寄奉

上諭那彥成奏遵旨前赴西寧查辦賊番復出肆掠一

摺據稱察漢諾們罕卽係白佛僧亦卽蒙古二十五旗之一原牧在循化邊外後移居黃河之南今又潛住河北時與野番勾結爲奸移之則驅而爲賊留之則引賊作賊所論甚是那彥成於野番情形熟悉著卽交那彥成辦理必須籌畫萬全妥爲安置勿使仍前窩賊分贓方稱至善其匿名揭帖字識務向各營汛嚴密訪拏正犯到案如比對筆跡確有可憑雖該犯託告得實亦按律治以應得之罪至所稱現屆九月西寧地方正值大雪封山之時未便議勦惟嚴飭各提鎮查明各卡隘山口額定兵數照例支給口糧

柴薪派令副將等官帶赴各卡隘分割駐守各提鎮  
來往會巡嚴密稽查使野番無由闌入內地並盤查  
漢奸代爲銷贓禁止商民出口私販茶葉火藥以防  
爲剿等語該野番等本係烏合之衆糾衆搶掠祇爲  
謀食果能實力防制使之無以爲生日久漸形窮蹙  
正可不剿自潰著卽照那彥成所奏辦理倘察看情  
形必須進剿俟明歲春融時再厚集兵力痛加剿辦  
斷不可存畏難苟安之見惟青海蒙古王公台吉等  
臣服已久迥非外夷可比若如那彥成所奏僅將各  
沿邊卡倫移駐官兵防守竟置該蒙古等於不問該

野番或於秋冬間乘隙往彼搶掠以致該蒙古不能  
自存亦非安邊撫馭之道况青海一帶爲通藏要路  
去年卽有進貢堪布被劫之事如該野番等故智復  
萌道路稍有梗阻殊屬不成事體那彥成亦不可不  
爲籌及也

道光二年九月二十五日

奏爲遵

旨確查青海現在情形酌安卡隘嚴拏漢奸恭摺具奏

事竊臣於陝西省城欽奉

諭旨前來西寧查辦番案當將酌辦機宜先行覆奏在



案九月初一日乾草店途次接准軍機大臣字寄  
道光二年八月十八日奉

上諭長齡奏野番一千數百人復過河北因察漢諾們  
罕前引官兵將其勦戮欲行復讐搶劫牲畜並殺傷  
男婦十餘人現已前往勦辦等語前因兵部於文移  
內拆出匿名揭帖聲言青海番賊復出約有二千餘  
人分作四股搶掠營馬擬及內地特降旨令那彥成  
前往查辦今據該督所奏番賊復過河北祇有一千  
數百人搶掠察漢諾們罕恐所奏番賊及殺傷人數  
均未確實著那彥成於到西寧後遵照前旨嚴密確

查將現在情形據實具奏欽此九月十二日奉到

批摺並八月二十九日奉

上諭那彥成奏遵旨前赴西寧查辦賊番復出肆掠一摺該野番等本係烏合之衆糾聚搶掠祇爲謀食果能實力防剿使之無以爲生日久漸形窮蹙正可不剿自潰著卽照那彥成所奏辦理尙察看情形必須進剿俟明歲春融時再厚集兵力痛加剿辦斷不可存畏難苟安之見惟青海蒙古王公臺吉等臣服已久迥非外夷可比若僅將各沿邊卡倫移駐官兵防守竟置該蒙古於不問該野番等或於秋冬乘隙往

彼搶掠以致該蒙古不能自存亦非安邊撫馭之道  
況青海一帶爲通藏要路去年卽有進貢堪布被劫  
之事如該野番等故智復萌道路稍有梗阻殊屬不  
成事體那彥成亦不可不爲籌及也欽此臣跪讀之  
下仰見

皇上燭照幾先無微不至曷勝欽佩臣自甘肅途次接  
見文武官員卽留心採訪於長齡先後辦理並蒙  
番現在情形具知梗概隨於平番縣途次會遇長  
齡晤談之下問以夏間督兵進剿旣經屢獲勝仗  
斬馘亦多自應在邊外駐兵一兩月以示軍威而

清餘孽據長齡聲稱彼時野番抗拒官兵者俱已  
勦除餘皆稽首乞命押令渡河回巢又慮餘匪藏  
匿山谷官兵路徑生疎隨分令各旗蒙古四出哨  
探官兵跟踪搜捕嗣據蒙古結報河北並無賊踪  
竊意野番不過貪利謀食如此勦辦已足褫其膽  
而攝其心且軍興糜帑不得不意圖撙節是以卽  
行凱撤實不料野番愍不知畏又復渡河北徙實  
係當日輕視野番致不能善其後等語臣又論及  
屢奉

聖明指示不能常以我兵衛護蒙古今察漢諾們罕手

下本多分賊作賊之人野番卽來讐殺何必再勞  
兵力代爲捍禦且穆蘭岱旣已帶兵出口卽應將  
渡河各番驅勦回巢因何不令深入又復撤兵據  
長齡聲稱接據察漢諾們罕稟帖原慮該諾們罕  
不能抵禦致擾內地當令穆蘭岱帶兵追勦復據  
諾們罕稟報賊已逃竄回巢未令深入卽在沿邊  
一帶酌議移駐兵防事後思維此舉亦屬率易且  
撤兵時卽當留兵此時安兵也失之晚等語是長  
齡之辦理不善亦不能自諱臣到寧後復密加採  
訪聞長齡勦辦之時野番實全數渡河自凱撤之

後又陸續移回河北貢額兩蓋及鹽池一帶又有  
野番十餘族在彼插帳至搶掠蒙古雖較前稍熄  
然自夏徂秋亦尙未盡絕大抵野番冥頑成性始  
貪河北水草私來游牧於蒙古之貧富內地之虛  
實豈能知悉自蒙古王公台吉虐其屬下其屬下  
今更窮苦反投野番謀生因而導引野番搶掠其  
主至內地歇家奸販貪利潛往貿易無事則教引  
野番漸擾邊境有兵又潛與報信總之野番本不  
知爲何處何人有蒙古而搶及蒙古有漢奸而擾  
及內地近年來番勢漸張其弊在此且至今日而

搶案之是否野番更有不能遽定者番子之辨祇在衣冠今則蒙古回民漢奸皆能爲番子之衣冠始僅勾結野番而爲之鄉導繼或並無野番而冒名肆掠遇有搶案但云野番賊去之後風傳爲漢奸漢奸爲誰共有若干卽云回民回民是何處回民蒙古是何旗蒙古又有若干均不得知亦祇概目以賊番二字卽現在賊番佔踞河北究竟何族在何處又何人爲首何族有蒙古何族有漢奸亦無人確指總之向未能精心偵探於彼中情形不悉何由扼其要而操其命爲今之計欲除外患先

絕內奸風聞西寧之丹噶爾哈喇庫圖及貴德循  
化巴燕戎格各屬回漢民人並熟番私販茶葉火  
藥口糧潛往番帳貿易者日久熟習卽是漢奸且  
此輩出口往往聚集多人執持槍械名爲防賊而  
伺間亦便搶掠臣現在分飭密拏已獲有十餘起  
督率西寧府縣嚴審務將其販自何人賣與何族  
或係該犯自己本錢或係領他人貨物務絕根株  
而斷禍種一俟訊有確供卽嚴加懲辦又有各屬  
蒙番歇家本係報官開設近有擇山僻處所私開  
小店野番晝夜至彼銷變贓物換易口糧該歇家



等卽私賣軍器火藥俱所不免臣亦飭嚴查官歇

家令其報明平日住歇何旗蒙古何族番子有人

住歇卽日報官查驗且祇係開店亦不許囤積糧

食布疋茶葉以及軍火等件倘違卽加重治罪此

外查有私開歇家卽行封禁並搜查有無囤積軍

火違禁器物以絕野番銷贓易糧之路臣愚昧之

見此時野番偷住河北不過貪圖水草卽其搶掠

亦祇貪小利並無他志而同民熟番與內地漢奸

搶劫成風勾結夥黨乃大可慮若不及早懲辦將

來內地之患更甚於外番此臣所以必先清內地

而後議辦野番也至西寧所屬卡倫已據長齡奏  
請於鎮海營移駐副將一員哈喇庫圖移駐都司  
一員並酌量裁添兵額已足以資捍衛惟查西寧  
一鎮管轄兵額至九千餘名未免太多俟確查各  
鎮管轄地方情形再行籌辦又甘州提屬及涼州  
肅州河州各鎮屬長齡未經議及臣已分飭各提  
鎮查明所屬毗連番地卡隘於通衢要路酌增防  
兵多不過百名山僻小路酌增防兵二三十名其  
路徑叢襍難以徧防者卽挖斷以杜偷越仍令該  
提鎮不時來往會巡其甘州邊境野馬川一帶與

西寧接壤亦屬野番出沒要路

臣擬令提

臣齊慎

酌於最要卡隘暫住備兵數百員名與西寧聲息相通則野番知有重兵不敢竄入亦不能越甘寧而擾涼肅齊慎日內亦到西寧會商統俟各提鎮查明卡隘置定兵數再行奏報如此徧設防兵既可防堵野番而內地奸商亦不能出入私販茶葉火藥口糧野番無所圖利又不能得食當必窮蹙而來請命彼時再申之以約束要之以重信或可幸得不勞兵力倘仍前佔踞抗不搬移甚且故智復萌意圖搶掠明歲春融定當厚集兵力痛加驅

勘總期河界畫清則蒙古回民漢奸旣絕引賊分  
贓之利又不能冒名肆掠庶可化莠爲良邊陲靜  
謐惟查河濱至內地卡倫地多平行本屬各旗蒙  
古之地今蒙古孱弱不振欲其復回原牧藩翰內  
地勢所不能而此平壤沃野竟成曠土野番時時  
苟偷覬覦沿河數百里勢又不可終歲設防虛糜  
帑項臣前在西寧大臣任內曾會同興奎長齡奏  
上屯田條議嗣經軍機大臣議駁臣何敢膠執前  
說惟從古治邊之法率以屯田而定由屯防而設  
軍衛由軍衛而改郡縣恐河北肅清之後終須議

及屯田方可收一勞永逸之效然事既重大亦復多需時日此時不敢豫定統俟臣再加諮訪虛衷熟商仍親歷履勘如果十分穩妥可行再行奏請訓示至青海蒙古王公台吉臣服已久誠如

聖諭何得置之不問查蒙古二十九旗惟河南四旗尙堪自衛河北二十五旗被野番搶掠窮蹙內徙現在移居丹噶爾及大通邊內者甚多卽有仍在邊外游牧者依附卡倫亦得所倚賴其有各旗戶下相近察漢諾們罕居住及與野番隣處者率皆從賊之人不值復爲庇護臣前奏漏未聲敘已蒙

聖明垂訓仰見我

皇上覆幬深仁無遠弗届叅以現在時勢更恬撫輯邊  
夷不可使之偏弱偏強始爲永久乂安之道捧讀  
之下實深欽佩欽感至蒙古口糧向准在青海大  
臣衙門起票換買惟每票定限一年徵銷是以蒙  
古屬下奸狡之徒卽將票張賣給野番每一票可  
以易糧數次臣現向松廷籌議嗣後每票祇准用  
一次所請用若干口糧卽註明糧數人數及牲口  
數目並問明程途遠近定以期限卽在卡倫呈繳  
該處兵弁亦卽當日具稟繳銷以杜偷賣野番之

弊而蒙古亦可無枵腹之虞又野番敬奉喇嘛所  
有屢次被劫之案半係堪布包容客商買賣並非  
堪布之物本年進京堪布之物業已到寧道路之  
梗尙可無慮至長齡勦辦野番屢獲勝仗衆目共  
見所奏尙非虛捏其奏報野番一千餘人與察漢  
諾們罕私相仇殺傷斃男婦十餘人調查該諾們  
罕原稟均與所奏相符並非以多報少且長齡一  
聞該諾們罕之稟卽奏明親往查辦亦無諱飾情  
事惟長齡督兵勦辦之時撤兵太多二次始行安  
兵致野番又復渡河插帳且察漢諾們罕實係野

番中之禍種雖媒長齡未經查明反爲之捍護草率輕忽誠如

聖諭先後辦理毫無把握應請

自治以應得之咎至野番陸續移居河北聞有十餘族之多惟何族住牧何所尙未能得其備細現在分用間諜四出哨探及察漢諾們罕一族窩賊分贓原屬可惡應如何辦理之處統俟訪查明確再行奏辦再甘省現屆武鄉試之期臣擬於月底回省較閱武闈事竣再來西寧籌辦謹

奏



道光二年十月初八日軍機大臣字寄奉

上諭那彥成奏確查青海現在情形並酌安卡隘嚴拏漢奸一摺據稱長齡勦辦野番屢獲勝仗所奏尙非虛捏惟撤兵太早且察漢諾們罕實係野番中禍種雉媒長齡反爲捍護草率輕忽已明降諭旨將長齡撤去雙眼花翎仍交部議處矣野番冥頑成性蒙古虐其屬下其屬下反投野番謀生因導引搶掠其主至內地歇家奸販貪利潛往貿易無事則教引野番漸擾邊境有兵則潛與報信近年番勢漸張弊實在此蒙古回民漢奸皆能爲番子衣冠始僅勾結鄉導

繼或冒名肆掠欲除外患自應先絕內奸其西寧之  
丹噶爾哈喇庫圖及貴德循化巴燕戎格各屬回漢  
民人並熟番私販茶葉火藥口糧潛往貿易者悉屬  
漢奸至各屬蒙古番子歇家擇山僻處所私開小店  
銷變贓物亦所不免此等回民熟番與內地奸民搶  
劫成風甚屬可慮那彥成所奏乃正本清源之道然  
必須辦理周妥計出萬全以期一勞永逸不可稍有  
疎失其所請分飭提鎮查明毗連番地卡隘通衢要  
路酌增防兵多不過百名山僻小路增防兵二三十  
名其路徑叢襍卽挖斷以防偷越野馬川一帶暫住

備兵數百員名俱著照所議行倘番賊仍前佔踞明  
歲春融卽厚集兵力痛加驅剿至屯田一節俟河北  
肅清後再行妥議具奏其各旗戶下相近察漢諾們  
罕居住及與野番襍處者率皆從賊之人不值復爲  
庇護所有蒙古口糧向准在青臣大臣衙門起票換  
買惟每票定限一年繳銷現據那彥成與松廷籌議  
著照所請每票准用一次所請用若干口糧卽註明  
糧數人數及牲口數目按程途遠近定以限期繳銷  
道光二年九月二十五日

奏爲查辦匿名揭帖控告賊番搶掠各案大概情形

先行具奏事竊臣前奉

諭旨前來西寧查辦匿名揭帖所控野番搶奪營馬擾  
及內地各案臣遵卽帶同司員鄒錫淳於九月初  
六日馳抵西寧分投妥查揭帖內稱賊番分作四  
股一股賊於六月十六等日劫掠西寧孳生營馬  
八十餘匹及蒙古牛羊一千有餘等語臣傳到管  
理孳生馬廠之永安營遊擊馬鳴謙據供本年從  
無被搶之事並將收弁劉詩張思茂牧兵張吉談  
啟需等隔別熬訊僉稱馬廠實無被搶之事臣向  
知甘省各營馬廠承管將弁或私自售賣或倒斃

逾額捏報搶竊或稱被水被蟲冀免追補乃其慣  
技茲歷訊弁兵堅供並未被搶密詢西寧大小文  
武亦稱未聞孳生馬廠被搶馬匹至揭帖所稱同  
日蒙古被搶調查西寧辦事大臣衙門是日實有  
蒙古貝子喇特納布第屬下被搶牛羊八百餘隻  
報案是揭帖所稱蒙古被搶屬實而馬廠被搶係  
屬子虛揭帖又稱二股賊於六月二十四五等日  
竄出涼屬鸞鴉平羌白石崖等隘口已在內地莊  
村擄掠馬牛羊隻等語檄查涼州有鸞鳥口而無  
鸞鴉口其白石崖乃甘州提屬飭傳鸞鳥口汛弁

徐建功守兵何殿伏平羌口防弁蘇國泰守兵吳  
興順並管轄白石崖隘口之遊擊沙生桂守兵趙  
興伏等先後到案臣逐一研訊僉供自六月至今  
各口隘從無賊番出入並密詢甘涼道張本枝涼  
州府英啟亦稱所屬內地村莊從未聞有野番搶  
掠之案是揭帖所稱涼屬內地村莊被搶之事亦  
屬子虛揭帖又稱三股賊於七月初五等日竄至  
甘屬野馬川野牛溝二道溝一帶搶劫前往永安  
貿易米麵貨物脚戶騾馬驢二百餘匹殺死脚戶  
一名刀傷坐卡兵丁一名等語詢據永安營遊擊

馬鳴謙供稱七月初六日據察漢俄博塘目兵吳建友稟稱初五日巳刻百餘人來至察漢俄博搶掠並將賣運米麪馱子搶去隨即四散傷斃民人一名刀傷塘兵一名伊聞信趕帶馬步兵二百名馳往追捕賊已遠颺並未擾及馬厰伊當卽報明西寧鎮至受傷塘兵姜大伏早已平復等語調查西寧鎮卷宗該鎮於十一日接據馬鳴謙稟帖卽日轉稟督臣長齡批飭該鎮督飭員弁實力緝捕其是否野番及貧窮蒙古回漢奸民據實具報該鎮隨以賊已遠颺無從查悉等情稟覆是揭帖所

控此案已屬得實至此項賣運米麵馱子卽係私販漢奸無票出口之人曠野被傷難以查究揭帖又稱四股賊於七月初九等日竄至肅境討賴川及五個山沙州金廠一帶搶劫孳生營馬三百餘匹並蒙古人等牛羊一千有餘等語臣檄提肅州孳生馬廠收弁因路遠尙未提到惟調查總督衙門辦理番案全卷內開據肅州鎮總兵李廷臣轉據孳生馬廠牧弁稟稱七月初五日有番賊四五十人搶去中營二廠孳生馬六七百匹該鎮卽選派備兵一百五十餘員名前往追捕等情當經長



齡劄飭金塔協副將馬光宇馳往嚴行查辦嗣據馬光宇稟稱遵查中營二廠牧馬原額六百四十三匹內蟲傷倒斃馬九十餘匹牧弁署把總張彪未經報出七月初五日夜間有賊四五十人至馬羣驚搶迫至黎明廠兵李芳會同附近廠弁牧兵二十餘人跟踪追趕賊僅二十餘人行走未遠一見官兵卽趕馬百餘匹逃走餘俱遺棄計追獲馬四百一十二匹惟時廠兵祁發已連夜報知牧弁張彪稟明該鎮派兵尾追至五個山賊已無踪復找獲馬一百四十一匹其下短九十一匹卽係張

彪未經報出倒斃之馬錄供稟覆經長齡以該廠  
弁兵疎於防範各加懲責辦理批結在案連日臣  
靜心度其情理賊有二十餘人夜間既已得馬馬  
羣非比牛羊行走必快該廠弁兵黎明始行追趕  
賊人竟被追及又未曾動手遂棄賊逃逸是日始  
經廠兵稟明收弁收弁又轉稟該鎮方派人尾追  
計已在第二三日之事乃賊匪未見官兵又棄之  
而逃方得將馬找獲其所短之數恰是虧缺之數  
是此案是否真賊是否捏報抑或廠馬本有盈餘  
被劫後數目尚可相抵捏作找回掩飾其罪該廠

弁兵尙未提到實在情節雖在未定而揭帖已非  
出於無因至所稱同日搶奪蒙古牛羊一千有餘  
查西寧辦事大臣衙門並無同日肅州蒙古報案  
則所控亦屬虛實參半臣伏查永安營屬搶案是  
否賊番旣難豫定而肅州馬廠在西寧之北距野  
番插帳之地千有餘里卽使被搶屬實而彼時野  
番甫經移回河北未必能逾越千里搶劫又一無  
所得而還容俟提到該弁兵嚴行確審如果虧短  
馬額捏報被搶再將該鎮及牧弁等嚴行叅辦至  
匿名揭帖之人臣前已遴派文武員弁分赴各臺

站嚴密訪查現尙未有踪跡不勝焦灼之至又揭帖內稱賊匪有二千餘人一股搶某處二股三股四股又搶某處賊匪分股何由得知事亦可疑竊意長齡本年督兵進剿因恐兵差擾累閭閻奏明所調各屬兵丁俱令步行習勞不給車輛已不免怨咨之作該督又派蘭州道楊翼武總辦糧臺楊翼武力圖撙節凡有冒領浮支之項皆嚴行裁汰以此缺望之人更多而保舉又不能徧及其爲甘涼一帶隨營未得好處之弁兵匿名訐告十有八九臣仍分飭嚴密訪查務在必得卽所控西寧馬

廠京州村莊二案現雖查無其事仍恐該管員弁  
匿報在先恃無實証狡不吐實俟獲犯之日再令  
指出實據則該員弁與匿名揭帖之人俱可明正  
其罪督臣長齡接據營員稟報搶案卽行嚴飭查  
辦至蒙古被搶報案西寧辦事大臣向不咨報總  
督衙門長齡均無諱飾其驅勦野番辦理不善業  
經另摺奏應免再議謹

奏

謹按道光二年十月初八日廷寄內奉

上諭那彥成奏查辦匿名揭帖控告各款內惟蒙古貝

子喇特納希第屬下被搶牛羊及察漢俄博買運米  
麵馱子被搶屬實其所稱西寧孳生馬廠及涼屬內  
地村莊被掠之處均屬子虛至番賊搶劫肅州孳生  
馬廠並蒙古人等牛羊一節肅州蒙古並無報案該  
廠弁兵尙未提到情節未能遽定著該督卽提到該  
弁兵嚴行確審如果虧短馬額捏報被搶卽將該鎮  
及牧弁等嚴叅至所控西寧馬廠涼州村莊二案現  
雖查無其事仍恐該管員弁匿報在先狡不吐實俟  
獲犯再行嚴切質訊至匿名揭帖之人於賊匪分股  
何由得知其爲甘涼一帶隨營未得好處之弁兵匿

名訐告已無疑議著那彥成分飭嚴密查訪務獲按律懲辦

道光二年十月二十三日

奏爲查訊匿名揭帖所控肅州馬厰被搶案件據實具奏事竊臣前在西寧查辦匿名揭帖稟控四股番賊搶掠各案業將所控虛實大概情形奏蒙

聖鑒並因肅州馬厰被搶一案情節支離尙須提犯覆訊隨摺聲明在案茲據肅州鎮總兵李廷臣將署守備岳成收弁張彪牧兵李芳等於九月三十日解到西寧臣當提李芳等嚴訊始猶狡稱馬匹被

搶後全行奪獲並未遺失一匹隔別熬審始據李  
芳供出除追獲馬五百餘匹之外實在被賊搶去  
馬九十餘匹前因張彪畏罪捏供爲蟲傷到斃未  
經報出之馬等語質之張彪俯首無辭臣復加研  
鞫緣張彪係甘肅武舉署理肅州中營把總經管  
孳生二廠牧馬共六百四十三匹道光二年七月  
初五日傍晚間牧兵李芳雷生春馬昌祁發等四  
人趕馬赴河飲水有賊四五十人內有說漢話之  
人騎馬持械從二國隆山口撲出將馬全行搶去  
祁發馬昌報知張彪連夜具稟該鎮李廷臣派委



署守備岳成帶兵一百五十餘名前往追捕一面稟知督臣長齡派委副將馬光宇馳往嚴行查辦維時李芳雷生春先已約同附近各廠牧弁兵丁二十餘人於初六日黎明跟踪追趕午後趕至素勒迤西地方賊有二十餘人因山梁路窄馬匹不能並驅行走遲緩一見官兵趕至卽選應壯馬二百餘匹逃走餘俱遺棄李芳等找獲馬四百一十二匹初八日岳成領兵前來復會同張彪李芳等趕至素勒迤東地方賊人正在該處牧放馬匹見官兵勢盛僅趕馬數十匹逃走餘又遺棄岳成等

趕過山梁賊已遠遁無踪復找獲一百四十匹兩次共找獲馬五百五十二匹下短九十一匹全係被賊搶去馬光宇抵肅查訊張彪因被賊搶馬多匹懼于重咎捏供全行奪獲其短馬九十一匹係蟲傷倒斃未經報出之馬情願自行彌補等語馬光宇錄供稟覆督臣長齡以該弁兵疎於防範責懲批結在卷臣提訊之下各供前情不諱並據張彪供認所短之馬業已自行彌補現無虧缺等語查匿名揭帖正犯未獲應將訊明之案先行議結此案武舉署把總張彪經管孳生馬厰收務被賊

搶去馬匹已屬疎於防範迨總督委員查辦懼于重咎復將被賊搶去未經追回之九十一匹捏供爲蟲傷倒斃之馬希圖含混實屬狡詐應請

旨將署把總之武舉張彪卽行革職該廠被搶之馬雖

據張彪供已自行彌補臣仍委員再行確查如有

虧短卽在張彪名下追賠牧兵李芳雷生春祁發

馬昌業經督臣長齡批飭責懲應免再議搶馬正

賊係現在拏獲之漢奸麻木溝爲首另摺具奏金

塔協副將馬光宇奉委查辦案件於張彪捏供之

處未能查出實情應與率行批結之督臣長齡均

請

旨交吏兵二部分別議處至匿名揭帖正犯

臣業經遵

派文武員弁兵往甘涼各臺站嚴密訪查並取具  
各臺站字識親筆供詞以憑磨對筆跡乃取到各  
供其字體間架與揭帖相似者頗多諦觀筆意則  
似微有參差悉心比對實不能得其確據連日復  
委員分往寧夏蘭州訪查總須將私拆口袋裝入  
揭帖之人查出端倪再行磨對筆跡庶可不致冤  
抑謹

奏

道光二年十一月初七日奉

上諭那彥成奏查訊肅州馬廠被搶案件一摺此案武舉署把總張彪經管收務被賊搶去馬匹已屬踈於防範迨總督委員查辦後將被搶未經追回之馬九十一匹捏供蟲傷倒斃希圖含混實屬狡詐張彪卽著革職該廠被搶之馬雖據供已自行彌補仍著該督再行確查如有虧短卽令張彪賠交金塔協副將馬光宇於張彪捏供之處未能查出實情與率行批結之前任陝甘總督長齡著吏兵二部分別議處

道光二年十月二十三日會同西寧辦事大臣松

公廷

奏爲擒獲搶掠蒙古撲犯卡隘之蒙古番子審明正  
法並籌定防卡兵數稽查歇家裁革通事嚴定蒙  
古買茶章程事竊臣那彥成前抵西寧卽劄飭甘  
涼肅州各提鎮察看沿邊要隘分設防兵並通飭  
西寧防卡將弁務當嚴密巡防毋使野番闖入內  
地九月二十六日據西寧鎮總兵穆蘭岱稟稱二  
十四日晚間有賊番一百餘人撲犯窩卜圖卡外  
委拜君朝帶卡兵二十五名悉力拒敵放鎗接仗  
至三更後將賊番打退該卡距日月山卡十餘里

當專差報知署遊擊丁玉柱帶領外委二員馬步兵一百五十名於四更時躡踪追趕二十五日午後追至奎天庫托地方賊番約有七八十人先行放鎗丁玉柱率領官兵奮勇直前鎗箭刀矛競發傷斃賊番十餘名生擒賊番索南木曲札亥羣本木二名奪獲騾馬駝隻臣等當將獲到賊番親提訊問據索南木曲札亥供係察漢諾們罕旗下阿倉族番子羣本木供係察漢諾們罕旗下蒙古又據同供本年九月十六日有葉什羣族野番羣本木約了我們兩人並不知姓名六十餘人剛咱族

堪布夸爾善水領著三十人剛咱族元乙領著十  
餘人共有一百多人騎馬持械往各路搶掠二十  
三日到博科地方搶了蒙古達爾濟公旗下牛羊  
一千餘隻分了幾十人先將牛羊趕回羣本木又  
聽見哈拉庫圖爾地方有蒙古往牧邀往搶掠二  
十四日夜行至窩卜圖地方羣本木見有土堡邀  
我們同撲當時一齊上前放槍撲卡被官兵放鎗  
打傷了我們的人羣本木纔帶領我們跑走復被  
官兵追至奎天庫托地方羣本木叫與官兵對敵  
官兵將羣本木等打散我們二人被擒等語

臣等



查該二犯聽糾搶掠蒙古並敢撲犯卡堡迨官兵  
追勦猶復抗拒對敵情同叛逆未便稍稽顯戮當  
於審明後將該二犯卽行正法並傳首沿邊一帶  
示衆在事出力弁兵臣等已分別記名獎賞復接  
據甘州提臣齊慎呈稱前接臣安卡之劄卽令守  
備愛隆阿帶兵五十名至邊外古佛寺一帶偵探  
防守九月二十一日愛隆阿行至峽道河有黃番  
阿羊拋等稟知被賊番百餘人搶去牛羊愛隆阿  
卽躡踪趕至黑河東岸見賊番在前當令兵丁放  
鎗傷斃賊番十餘名賊番搶渡黑河流斃無數餘

俱逃逸奪獲牛羊四百餘隻分給事主認領等情  
茲臣亦將愛隆阿記名鼓勵查甘涼肅州各提鎮  
所屬邊地臣那彥成前已奏明安設卡隘添置防  
兵現在西寧甘州防勦已著成效則此時尤不可  
緩臣等會同提臣齊慎鎮臣馬騰龍穆蘭岱等熟  
商於甘州提屬撥兵七百名涼州鎮屬撥兵四百  
名肅州鎮屬撥兵四百名分安各要隘可期聲勢  
聯絡並各於適中之地總紮一營仍分出兵丁各  
路防卡一有賊信立即追勦至西寧鎮屬業經前  
督臣長齡會同臣松廷奏請移駐將弁兵丁此外

若有應行改移之處

臣

等再行相機隨時辦理惟

期於事有益河南循化貴德兩廳屬毗連番地誠

恐河北野番因

臣

等斷絕糧茶潛赴河南搶劫謀

食亦未可定且恐漢奸由河南偷運糧茶軍火渡

河接濟賊番不可不先事豫防現在派撥貴德營

兵二百名民兵二百名循化營兵三百六十名分

立卡隘嚴密巡防至河州在循化迤東野番不能

擾及惟四川松潘番地所產黃茶及省城一帶私

茶並販口糧之犯均偷出河州各關潛至番地售

賣查河州鎮屬二十四關本有卡兵

臣

等現今該

鎮於各卡添安兵一百三十五名專司查緝此外  
仍查有小路亦卽隨時增添以期周密所有現在  
河南北安設卡兵除西寧鎮屬外計共二千三百  
九十餘名均係由本營調赴各卡應請照防卡章  
程每日官一員支銀一錢兵一名支銀五分其追  
至二百里以外果有斬擒按往回日期照防卡加  
倍支給銀兩所獲牲畜衣物概以給賞仍記功拔  
擢用示獎勵至青海蒙古番子來至西寧各城內  
向設官歇家容留住宿該蒙番等易買糧茶什物  
均係官歇家爲之經理仍於蒙番等來去時日報

官查核倘有滋事卽爲官歇家是問舊例本屬周  
妥乃日久廢弛官歇家勾通蒙番私賣口糧並夾  
帶違禁器物甚且於山僻小路分開私歇家招引  
野番於晝夜私自授受銷贓易糧私買軍火番案  
日多番情日肆半由於此臣等查蒙番進口言語  
不通凡有情弊必由歇家而歇家因此牟利弊日  
滋甚現在查山僻小路私歇家臣等業已封禁照  
例加等治罪不准復開外嗣後應令西寧大通循  
化貴德丹噶爾各屬地方文員並哈拉庫圖爾營  
員將所有城關歇家無論在官在私均一律造具

花名清冊由官經管並將向來招接何旗蒙古何族番子註明彼此不許牽混先由地方官造冊聲明詳報西寧辦事大臣衙門備查另立循環印簿每歇家兩本將逐日來店住宿之蒙番詢明何事進口所帶何貨所換何物詳細填註簿內無論有無住宿次日呈官查驗循去環來毋得遺漏仍按月呈報總督衙門以備稽核又蒙古請票易糧期限一年銷票每票可以易糧數次致不肖蒙古將票張賣給野番私相接濟臣等前已會議糧票章程奏明在案惟蒙番口食糧茶並重若蒙古買茶

漫無稽察又不予以限制勢必多買接濟野番不  
可不防臣等現今各旗蒙古請票易糧之時每糧  
一石配茶二封卽於糧票內註明其買糧不買茶  
者聽之若貧窮蒙古無力糧茶並買亦呈明西寧  
辦事大臣衙門酌給單買茶葉印票每票不得過  
三封出口之日卽在卡上將舊票繳銷再請新票  
仍令差役歇家眼同該蒙古等照數易買糧茶並  
令歇家出具並無多買結據倘蒙古等所買糧茶  
浮於印票請領之數一經沿邊卡隘查出將差役  
歇家一併治罪至野番易買糧茶向無章程查河

北賊番固當絕其糧茶而河南生野番族安分者  
多未便一概斷絕令其枵腹現在分遣員弁至貴  
德循化傳齊河南各寺喇嘛並各族曉事番子令  
將各族戶口報明准其計口易買糧茶不准多買  
以杜接濟河北賊番之弊仍須與蒙古等一律請  
票方可稽查周密惟野番素無統屬游牧散處或  
由就近喇嘛寺代爲請票或查明該番等族中酌  
立千戶百戶百長統轄該族代爲請票所有糧茶  
數目亦均照蒙古之票辦理就近在貴德循化廳  
營呈請如某族番子有作賊之人喇嘛千百戶等



卽不准代爲請票仍責令擒獻倘私相庇護朦混  
請票卽將請票之人治罪如此辦理則操縱在我  
使野番知我可以制其生命自生長服至佔踞河  
北野番卽係河南野番總須歸回河南方准請票  
易買糧茶現在先將河南番族辦理周密不能將  
茶糧私自接濟則河北野番計必日見窮蹙亦可  
無慮其再肆鴟張臣等現在督飭所屬文武趕速  
籌議俟定有章程再行入奏又西寧辦事大臣衙  
門向有額設通事凡蒙番呈訴事件俱係通事傳  
話新任辦事大臣情形不熟往往藉爲耳目若輩

盤踞日久遇事生風其弊更甚小則與歛家朋比  
爲奸代蒙番私買違禁貨物從中漁利所傳之話  
則又顛倒是非以遂其牟利之私大則勾通煽惑  
以有事爲樂遂致滋生大案實爲番案中之一積  
蠹不可不除其積習臣等會同商酌應將西寧辦  
事大臣衙門額設通事全行裁革遇有案件不拘  
西寧鎮道府縣衙門俱有通事可以隨時傳喚應  
差卽西寧城中民人能說蒙古番子話者甚多該  
大臣亦可自行僱覓應用更覺關防嚴密此外各  
衙門通事亦飭令各自嚴查有從中舞弊者照例

加嚴治罪倘不經心致滋別事仍將該管官交部  
嚴議再察漢諾們罕窩賊分贓已久此次丁玉柱  
所擒賊犯卽係其所屬蒙番且連日掣獲出口漢  
奸<sub>臣</sub>等詳加研訊僉稱該旗作賊者居其大半是  
該諾們罕不第引賊而早已作賊實不可再爲姑  
息容留<sub>臣</sub>等已將該旗糧茶與野番一概斷絕諭  
令該諾們罕將其屬下賊犯按名擒獻卽速遷居  
河南原牧仍可貸其重罪倘稍涉抗違明春定當  
首先剿辦其阿里克番子屬下聞亦有作賊之人  
若令防堵野番斷不可恃應如何辦理之處容<sub>臣</sub>

再爲斟酌妥辦所有長齡奏定每年賞給察漢諸  
們罕及阿里克銀二千兩之處應請停止至佔踞  
河北野番係上下剛咱族葉什羣族汪什代克族  
角昂族蘊依族雙勿族賊犯尤多其餘哈咱族什  
多吧族加咱族牙合爾族阿錯合族亦均多作賊  
之人伏思該番等犬羊成性冥頑不靈若不教而  
誅殊非所以仰體

皇上好生之德現在書寫番子字告示派令喇嘛持往  
曉諭令該番等將各族著名賊犯擒獻安分回巢  
尙可仰乞

天恩法不加衆倘仍萌故智則目前斷絕糧茶悉爲餓  
殍卽幸能度命明春大兵所至玉石俱焚庶以震  
懾其心冀可窮蹙歸命俟喇嘛等回稟察看實在  
情形再行奏報謹

奏奉

硃批所辦均是另有諭旨

道光二年十一月初七日軍機大臣字寄奉

上諭那彥成等奏擒獲搶掠撲卡之蒙古番子審明正  
法並籌定各章程一摺所辦均是此次賊番百餘人  
撲犯窩卜圖卡經那彥成督飭番遊擊丁玉柱率領

官兵奮勇直前傷斃賊番十餘名生擒賊番索南木  
曲札亥羣本木二名現據訊明係葉什羣族野番羣  
本木等糾約搶掠撲犯卡堡當將該二犯正法又守  
備愛隆阿因聞黃番阿羊拋等稟知被賊番百餘人  
搶劫該守備趕至黑河東岸鎗傷十餘名淹斃無數  
奪獲牛羊分給事主認領出力弁兵俱著該督等分  
別記名獎賞鼓勵至涼州肅州所屬邊地安設卡隘  
添置防兵請於甘州提屬撥兵七百名涼州鎮屬撥  
兵四百名肅州鎮屬撥兵四百名分安各要隘並各  
於適中之地總劄一營仍分兵各路防卡其河南循

化貴德兩廳屬毗連番地現應豫防河北野番搶劫  
及漢奸偷運糧茶軍火渡河接濟請派貴德營兵二  
百名民兵二百名循化營兵三百六十名分立卡隘  
嚴密巡防又河州鎮屬二十四關查緝偷販私茶口  
糧添安兵一百三十五名除西寧鎮屬外共安設卡  
兵二千三百九十餘名請照防卡章程每日官一員  
支銀一錢兵一名支銀五分如追賊至二百里以外  
果有擒斬按往回日期照防卡加倍支給銀兩所獲  
牲畜衣物概行給賞仍記功拔擢俱著照所請辦理  
惟沿邊移駐官兵係一時權宜之計日久恐滋糜費

務須於春融後趕緊勦捕尅期肅清一俟邊隅靜謐  
卽行裁撤至西寧各城內向設官歇家容留蒙番近  
復於山僻小路分開私歇家銷賊易糧私買軍火自  
應嚴行查禁嗣後西寧大通循化貴德丹噶爾各屬  
地方文員並哈拉庫圖爾營員將所有城關歇家無  
論官私一律造具花名清冊並循環印簿詳細填註  
由地方官詳報備查其各旗蒙古請票易糧每糧一  
石配茶二封著於糧票內註明如買糧不買茶及貧  
窮蒙古無力糧茶並買俱著由西寧辦事大臣衙門  
酌給印票填註數目如有浮冒請領者查明治罪又



河南安分生野番族易買糧茶卽著各寺喇嘛並各  
族曉事番子報明戶口計買均照蒙古之票辦理就  
近在貴德循化廳營呈請如番族中有作賊者卽不  
准代請致滋朦混現在佔據河北野番俟歸回河南  
方准請票易買糧茶仍著該督等速籌章程趕緊辦  
理所有西寧辦事大臣額設通事日久滋弊著卽全  
行裁革遇有案件由各衙門傳喚應差倘查有舞弊  
者卽從嚴治罪至察漢諾們罕窩賊分贓已久斷不  
可姑息容留此時業將該旗糧茶與野番一概斷絕  
如能將屬下賊犯按名擒獻遷回河南原牧尙可貸

其重罪若稍涉抗違明春卽行勦辦所有長齡原請  
每年賞給察漢諾們罕及阿里克銀二千兩之處卽  
著停止其佔住河北野番各族其中亦多作賊之人  
現在書寫番子字告示令喇嘛持往曉諭俟查有實  
在情形卽行具奏

道光二年十月二十三日會同西寧辦事大臣松  
公廷

奏<sub>臣</sub>那彥成到西寧之後分飭文武官員拏獲私買  
糧茶軍器之漢奸並搶竊之民人及假裝野番行  
竊之蒙古共二十餘案情僞百出供詞亦均極狡

猶先委兼護西寧道之西寧府巴彥珠審鞫嗣因  
人犯衆多更有本任地方查奸緝私等務甚多該  
守一人難以兼顧復檄調鞏秦階道劉斯嘯寧夏  
府知府賈履中來寧委令會訊節據錄供稟報仍  
有未盡確實之處均已駁令覆審臣那彥成侯武  
闡完竣卽赴西寧會同臣松廷親行勘辦凡犯該  
死罪人犯均奏明請

旨其軍流以下人犯照例咨部辦理至漢奸勾通野番  
搶掠人所盡知而究竟何處之人又何人爲首總  
未確實今將匝月各路密差切訪方得知有回民

麻木溝一犯往來各邊外草地常糾約無賴假裝  
番子且與賊番熟識不時領路搶掠行踪詭譎而  
又迅速莫能跡其巢窟當經密飭勤幹將備懸賞  
購線分投查拏茲據署永安營遊擊之都司周佐  
勝稟稱遵諭購線躡訪得知麻木溝竄匿野馬川  
一帶伺便搶竊分派千總李孝外委張文秀帶兵  
並帶眼目伏於野馬川八寶山草地露宿數日見  
麻木溝騎馬持械走至該弁等鼓勇上前該犯策  
馬奔逃外委張文秀等奮力追趕數十里該犯至  
牛心山林裸棄馬入林該外委等亦步行追入先

用矛將該犯左股刺傷始行擒獲並將同行之黃奎添一名亦一併拏獲一面具稟一面解赴西寧聽候訊究臣那彥成當卽飛飭該道劉斯崑等研訊是否真係麻木溝一犯且夥黨若干人向犯若干案頃據稟報麻木溝已供認帶領察漢諾們罕等族番子搶劫多案又本年七月初六日搶劫肅州馬廠孳生馬匹亦卽該犯爲首臣仍飭該道等研訊所犯案件並窮究黨羽務盡根株仍俟臣前赴西寧會同臣松廷親行研審由此可將漢奸情偽審得以後辦理亦有頭緒除出力兵丁由臣獎

拔賞勵外所有都司周佐勝等擒獲巨盜緝捕實  
爲勤能應俟審明定案時再行奏請鼓勵謹  
奏

謹按道光二年十一月初七日廷寄內奉

上諭那彥成等另片奏據署永安營遊擊之都司周佐  
勝等擒獲麻木溝一犯已供認帶領察漢諾們罕等  
族番子搶劫多案又搶竊肅州馬厰孳生馬匹卽係  
該犯爲首所辦甚好著卽研訊所犯案件並窮究黨  
羽務盡根株所有緝捕勤能之都司周佐勝等俟定  
案時奏請鼓勵出力兵丁酌予獎賞至此案匿名揭

帖人犯尙未得有確據著嚴密查訪務將私拆口袋裝入揭帖之人查出端倪磨對筆跡嚴行懲辦毋稍枉縱

道光二年十月二十三日

奏查近年番案之多實緣漢奸潛行出口私與野番

勾結始僅販賣糧茶繼且導引搶掠

臣業將嚴辦

漢奸緣由奏明在案茲接准刑部奏駁長齡等原

審巴燕戎格廳回民馬噶奴等一案令

臣復行審

擬查案內擬絞之馬如世一犯因解省中途病故

業經

臣

照例具題毋庸再議馬噶奴一犯糾約莊

鄰番回二十四人置備口糧襍貨各持器械潛運  
出口向野番換羊皮羊毛經長齡等奏將該犯比  
照滇省永昌等府邊外私販數在一二十人以上  
爲首例問擬絞決原爲整頓邊防懲一儆百起見  
惟原摺內未曾將邊地情形聲敘明晰致干部駁  
經臣在西寧會將馬噶奴等覆審並向追訊究出  
該廳熟番回民常至野番族內貿易各犯現飭查  
拏至馬噶奴於旣已撤兵後仍敢糾夥多人通番  
濟匪本屬大干法紀卽擬以斬決梟示亦不爲過  
且現當整頓之始實未便拘守成例轉致奸民無



所忌憚釀成邊衅馬噶奴一犯仍請照長齡等原  
奏問擬絞立決現在又復張掛告示明白曉諭倘  
敢有再犯之奸民或情節似此者卽照此例定擬  
若審有勾通煽惑重情仍當梟示方足示儆統俟  
野番安分邊疆靜謐後再照常例辦理謹

奏

道光二年十一月初七日奉

上諭那彥成覆奏部駁之回民馬噶奴一案請仍照長  
齡等原奏問擬等語此案馬噶奴膽敢糾約莊鄰番  
回二十四人置備口糧襍貨持械潛運口外向野番

易換羊皮等物通番濟匪大干法紀除馬如世一犯  
業經病故外馬噶奴著卽處絞嗣後倘敢有再犯之  
奸民情節似此者卽照此定擬若審有勾通煽惑重  
情仍加梟示以儆奸宄俟邊疆靜謐後再照常例辦  
理該部知道

道光二年十月二十五日

奏爲遵

旨體察督

臣

長齡移駐西寧沿邊營汛情形並秉公覆

看奏請陞調營員據實覆奏事竊

臣

前在西寧郡

城接准軍機大臣字寄道光二年九月十二日奉

上諭長齡等奏酌擬西寧沿邊各營汛移駐官兵以資防剿據稱邊界要地分駐官兵以馬四步六安設豫備軍火口糧探得賊番竄擾立即追剿查哈拉庫圖爾係第一衝要請將該營增官兵三百餘員名卽在附近之鎮海營添設弁兵一千三百餘名移駐副將都守等員再於永安屬之黑石頭等處添設營汛移駐官兵等語著那彥成悉心體察該處情形是否係要隘地方必須添設官兵防守詳細查明據實具奏又長齡奏請以劉印景陞補鎮海營副將廬亨調補大通營遊擊馬進忠調補鎮番營遊擊鎮海營界連

蒙古番地必須諳練之員方克勝任著那彥成到任  
後秉公察看劉印景等是否人地相宜據實奏聞再  
降諭旨長齡等捐單一併抄給閱看欽此臣伏查西  
寧邊外與蒙古牧界毗連山僻小路處處可通今  
野番佔住蒙古牧地搶掠蒙古甚且擾及邊境本  
年夏間雖經長齡驅勦回巢而旋復北渡現屆大  
雪封山不能進勦則沿邊兵防之設誠爲目前第  
一要義臣雖曾任西寧辦事大臣爲日不久於河  
北情形未曾親歷事關邊務不敢草率急就旬日  
以來接見文武大小員弁悉心諮訪查西寧日月

山之南卽係蒙古牧地山北哈拉庫圖爾實爲大通縣丹噶爾沿邊第一衝要原設僅弁兵一百四十餘員名不敷防剿之用但該處在夾山之中地勢窄狹若屯設重兵地狹人衆不能得力長齡等請於該營移駐都司等員增官兵爲三百名係屬因地制宜應如所奏辦理至哈拉庫圖爾之內七十里爲鎮海營卽附在丹噶爾城內查丹噶爾原係各旗蒙古換易糧茶什物之地商賈雲集近日蒙古貧窮而野番旣踞河北往往潛至該處私相貿易漢奸私販與野番潛相勾結者該處爲最多

現在臣嚴禁野番易買糧茶絕其口食該番等揚  
腹窮蹙尤恐覬覦內地希圖搶掠餽口鎮海營屬  
必須屯設重兵既可爲哈拉庫圖爾策應而野番  
知有重鎮亦不敢復生他志原設遊擊一員統領  
弁兵三百餘員名兵勢尙單長齡等請於該營移  
駐副將等官增官兵爲一千二百餘名亦應如所  
奏辦理至永安營白塔營所屬與蒙古牧界處處  
可通勢難徧設兵防惟當相度地勢安設下隘或  
倚高阜可以俯視平原或扼總路可以控制歧徑  
長齡請於永安屬黑石頭雙城俄卜白塔屬之黑

林口武勝溝及附近哈瑪爾托亥撥科等處添設  
營汛移駐官兵臣逐加訪察實俱係緊要隘口應  
請均照所奏辦理至長齡所稱分駐官兵以馬四  
步六安設豫備軍火口糧探得賊番竄擾之信立  
卽裹帶追剿等語查邊地遼遠賊番均係騎馬行  
走迅速追剿之兵馬隊最爲得力惟營制所關斷  
不能止安馬兵且無賊之時稽查奸商私販出入  
緝捕偷越卡隘之犯步兵亦可効能所議馬四步  
六尙屬酌中定制應請照辦又所奏各提鎮標移  
撥官兵急切不能前來於西寧鎮派出官兵挑留

二千餘員名先行分撥駐劄照防卡章程每日官一員支銀一錢兵一名支銀五分追至二百里外果有斬擒按往回日期加倍支給所獲贓物概以充賞俟各標官兵移駐到日再將西寧防卡之師撤回歸伍所需添建營堡衙署兵房卽令藩司遴委道府大員照依西寧地宜以土堡土房勘估購料俟來年春融妥速興修竣事等語查長齡等就近派撥西寧弁兵先行駐劄防守現在防堵番賊緝拏漢奸稍有成效長齡等請照防卡章程給與口食並量予賞號應如所奏辦理至所奏添建兵



房營堡衙署一節臣伏思現在沿邊防堵原係權宜之計應俟來年驅逐野番回巢之後另議善後章程或相地移營或籌辦屯田爲一勞永逸之計統俟臨時酌定刻下尙無庸勘估興修至鎮海營界連蒙古番地現當辦理番案喫緊之時新移副將一員誠如

聖諭必須諳練之員方克勝任現據長齡奏請以河州鎮標右營遊擊劉印景陞補並聲明該員籍隸固原州請陞本省副將於例未符但人地實在相需且離本籍在五百里以外等因臣覆查劉印景久

任西寧河州各屬將弁於番地情形實爲熟悉嘉  
慶十二年曾隨臣在西寧辦事大臣任內辦理番  
案臣亦深知其熟悉情形以之陞任鎮海營副將  
洵屬人地相宜惟該員現任遊擊雖應陞叅將業  
已九年而以遊擊超補副將未免過優相應請

旨俯准以劉印景暫署鎮海營副將俟歷俸三年如果  
始終奮勉格外出力再行奏請實授倘稍涉懈弛  
卽當撤任嚴叅使該員自知感奮勉力而臣亦可  
收指臂之効至大通營遊擊亦屬沿邊要缺據長  
齡奏請以鎮番營遊擊盧亨調補所遺之缺請以

卷五十二  
裁缺遊擊馬進忠補授查盧亨屢次出征著績操防亦能認真馬進忠亦係裁缺候補之人均非越級超陞應請照所奏辦理謹

奏

道光二年十一月初七日奉

上諭那彥成奏體察移駐西寧沿邊營汛情形並請陞調營員一摺青海野番滋事經長齡勦辦大獲勝仗凱撤後復有番賊過河搶掠之案自應沿邊添設官兵以資防勦前據長齡等奏酌擬各營汛移駐章程當經降旨交那彥成體察情形具奏茲據查明西寧

邊外與蒙古牧界毗連哈拉庫圖爾實爲大通縣丹  
噶爾沿邊第一衝要原設弁兵一百四十餘員名不  
敷防勦惟該處在夾山之中長設重兵不能得力著  
於該營移駐都司等員增官兵爲三百名其鎮海營  
屬必須屯設重兵原設遊擊一員統領弁兵三百餘  
員名兵勢尙單著於該營移駐副將等官增官兵爲  
一千二百餘名至永安屬之黑石頭雙城俄卜白塔  
屬之黑林口武勝溝及附近哈瑪爾托亥撥科等處  
俱係緊要隘口著一併添設營汛官兵其分駐官兵  
著卽照長齡所請以馬四步六安設豫備軍火口糧

又長齡等前奏就近派撥西寧弁兵先行駐劄防守  
現在防堵番賊緝拏漢奸稍有成效著卽照防卡章  
程每日官一員支銀一錢兵一名支銀五分給予口  
糧並量予賞號其添蓋兵房營堡衙署一節刻下無  
庸勘估興修俟來年驅逐野番回巢後另議章程辦  
理所有鎮海營副將著准其以劉印景暫署俟歷俸  
三年如果始終奮勉再請實授稍形懈弛卽撤任嚴  
叅大通營遊擊著以鎮海營遊擊盧亨調補所遺員  
缺卽以馬進忠補授該部知道

道光二年十一月二十四日會同西寧辦事大臣

松公廷

奏爲清釐河南番族編查戶口明定章程並河北賊  
番情形恭摺具奏事竊查雍正年間平定青海插  
旗定地以黃河爲界河北二十五旗蒙古河南有  
五旗蒙古其餘均安番族而河北地土肥饒河南  
則水草不能皆好自來番族皆謂偏袒蒙古盡與  
善地常有垂涎河北之心當其始分族而居每族  
不過百餘戶或數十戶地廣人稀游牧尙可相容  
迨後丁口日繁互有強弱搶劫蒙古乃其世仇覬  
覷河北亦其素志而今之蒙古孱弱已極不但不

能自強且均逃散或依附官兵營卡或避至附近  
州縣游牧則無牲畜謀食又無守業多在西寧及  
甘肅等處乞食窮苦實在可憫一時竟難歸束  
河北數千餘里盡屬曠土是以野番佔住不但不  
能驅逐防衛甚至無由知其消息而要知今之佔  
踞河北之番原卽河南之族是以欲辦河北先辦  
河南總由該野番等素無統屬散處游牧因而貪  
圖水草潛行渡河馴致嘯聚成羣劫掠雖現在河  
南循貴各番族尙知安分未敢偷渡而推其初心  
亦未必不垂涎於河北若不先趁其畏懼之時立

法約束使之恪遵則將來紛紛效尤盡佔踞河北  
數萬蒙古無處安生再復勾結漢奸則勢已成而  
愈不可制且方今驅逐河北野番使歸原牧業將  
其糧茶斷絕時當冬令草枯畜牧疲羸又有官兵  
營卡嚴布口隘勾通已斷欲進不能識路不敢離  
巢住則糧茶俱無勢將坐困衆心渙散窮蹙已形  
目下不過苟延於河北至苟延之不能則暫退河  
南防制少疎又復偷渡是令其歸巢不難其難實  
在於令其不復偷渡自應於此時設法清釐俾有  
鈐束亦須分弱其勢不能再事鴟張然番性多疑



俟其歸巢以後始與河南同議編查不惟人數衆多一時難以稽核且彼見河南各族向未分別人戶因其過河一旦驅使俯受鈐束紛擾之餘轉滋驚懼故欲令河北之番悉消叵測必先將河南之族申以條規臣等愚昧之見先治河南正所以清釐河北前已將督飭所屬文武趕速籌議緣由隨摺聲明在案嗣據各委員會同循化貴德二廳查明各該屬之番族開具清摺賫送前來臣等查貴德所屬有生熟野番三種熟番五十四族俱種地納糧均能謀食生番十九族住居貴德之東南畜

牧爲生亦距河稍遠惟野番八族戶口強盛內有  
汪什代克一族近已全數移居河北其餘七族現  
俱插帳河濱遠難控制難保無接濟河北賊番及  
偷渡爲匪等弊不能不先爲清釐至循化番族舊  
止生熟二種熟番十八族生番五十二族大半皆  
有糧地又與四川之松潘相近購辦川茶行運生  
業較爲充裕而近年如葉什羣等族亦頗不安本  
分竟行闖入河北又該處有拉布浪宗卡隆務三  
大寺招住喇嘛不下二三萬人亦不免易藏奸宄  
均須逐細編查清其積弊

臣

那彥成於武闡未經

竣事之先卽遣員弁帶同喇嘛札莫洛碩等前往  
河南各族剴切宣諭令其將頭目人等帶赴西寧  
續於本月初間據該員弁等將貴德之千布衆下  
拉安揣咱上下剛咱完受都受他受七族千百戶  
完的等暨循化之賀爾索乃黑溫家什加加官受  
多哇布什巴爪什則等八族千百戶安木加官布  
等前後抵湟<sub>臣</sub>那彥成亦卽趕到當日遂逐一傳  
見諭以汝等皆係安分良番遵守

王法向不作賊之人然各族內有逃至河北及勾結賊  
番者此時卽行喚回或卽行擒獻毋得隱匿不報

自干重罪河北野番過河以後查清其人戶如有  
爾等族內之人卽交爾等管束若有漢奸亦卽緝  
獻必加重賞該千百戶等咸各俯首聽命查撫輯  
邊夷之道貴在渙散其黨以孤其勢不可使有偏  
強偏弱現在到湟之各番族頭目有一族而分數  
人者卽有一人而管數族者衆寡不一弱者弱而  
强者愈強旣恃其強必不安分因爲分其戶每三  
百戶設千戶一人千戶之下設百戶百總什總凡  
百戶一人每管百戶三百戶歸一千戶管理百總  
一人每管五十戶兩百總歸一百戶管理什總一

人每管十戶五十戶歸一百總管理向來各大族  
多有一千戶幾至二千者倚其人衆便易生事今  
定以千戶爲大而千戶所管祇准三百戶不許增  
多但計戶數至一千戶以上卽分爲三人管理勢  
分力弱自易遵法又令其公舉誠實公直之人飭  
令充補至舊例千戶五品頂戴百戶六品頂戴百  
總什總七八品頂戴其千戶出力者賞給藍翎再  
有出力加賞花翎此次旣分設千戶等名目自應  
照例給予頂戴仍明白曉諭此時暫准照例戴用  
虛頂再過三年管理無過方發給印照號紙方爲

實缺<sub>臣</sub>等又復加重賞給銀兩綢布糧茶各族目  
歡舞叩頭趕緊各回原牧遵照章程清查俟辦理  
完竣再來回話各自歡忻前去並將酌定易換糧  
茶章程計口授食每年准買兩次由戶總報明千  
戶千戶結呈廳營給予照票註明實係良番置買  
糧茶若干官爲經理發舖照賣若有不遵法度之  
人卽不准領票至所必須之布線靴帽木碗之類  
亦於票內註明一同換買總之均由官爲經理奸  
商卽不得昂索價值正可絕其私交以杜漢奸串  
通之弊給買之後卽將照票繳銷不准重用仍一

面嚴飭文武實心經理不得任聽吏役從中刁難勒指又曉諭番族等內地奸商最爲可惡積年以來重利盤剝刻苦番民今皆令官爲經理則無須私相交易物價亦得公平所有爾等拖欠民人賬目概不必償還漢奸拖欠爾等之賬卽刻呈出不但立刻代爲追給並將漢奸治罪將其家產查變加倍償還如有漢奸前往索欠立即縛送並有重賞當經繕寫告示各十二則曉諭循貴二廳番族卽交現來之千百戶代回仍一面飛飭派委明白熟悉文武分赴各該處清查其戶口照內地保甲

一例編查此外各族生番尙有觀望不前者卽行曉諭令其來見亦照規定章程妥爲措置此時河北野番正當進退維谷之時尙恃有河南爲之歸宿今則各清各族概不容留孤立之勢已成而河南漢奸旣除繫援之路又斷前後隔絕萬不能以久延此時若一招徠自必乘機抒誠悔罪冀延喘息但不使之窮蹙至極備嘗艱苦則仍易犯法此時並嚴卡鹽糧茶大約旬月之間諒可肅清河北至河北之番半係各族强悍可以作賊之人原係一時烏合今卽趁其過河之時查明原係何族之



人歸於何族安插十家管束一人亦易爲力其自爲一族人戶衆多者均卽照河南之例辦理設立千百戶等選擇承充伊等見各番族均已遵從亦可免其疑懼是河南之法一定河北之番但一過河卽在設中旣散其人又令其自然歸我法制似可不勞而理統俟各野番有渡河確信臨時或有更動再行斟酌奏明辦理謹

奏奉

硃批所奏均悉另有諭旨

道光二年十二月初七日奉

上諭那彥成等奏清釐河南番族並河北賊番情形現在河南循貴各番族尙知安分自應趁其畏懼之時立法約束該督現傳到各番衆面加曉諭如各族內有逃至河北勾結賊番者卽著擒獻毋許隱匿其河北野番過河以後查係伊等族內之人自行管束如係漢奸立卽緝獻所有各番族頭目准其按計戶口百戶一人每管百戶至三百戶一千戶管理百總一人每管五十戶兩百戶歸一百總管理什總一人每管十戶至五十戶歸一百總管理令其公舉誠實公直之人充補其千戶等著照例給予頂戴俟三年無

過發給印照號紙作爲實缺至易換糧茶章程每年  
准買兩次由千戶結呈該廳營給予照票如實係良  
番方准發舖照買所需布線等項亦於票內註明一  
同換買此時河北野番勢成孤立該督仍嚴查卡隘  
糧茶趕籌肅清至河北番族應趁其過河之時查明  
安插均著照河南之例辦理俾不至疑懼該督仍察  
看情形再行妥議具奏

道光二年十一月二十四日會同西寧辦事大臣  
松公廷

奏爲審明交通野番之重犯卽行正法恭摺具奏事

竊道光二年九月十三日據西寧鎮總兵穆蘭岱  
西寧府知府巴彥珠稟稱訪聞有積慣私行出口  
與野番交通之蘇誠一犯隨督飭所屬將蘇誠拏  
獲等情臣等當卽飭令嚴行審究據該犯供認私  
行出口在特禮貝勒旗下察漢諾們罕旗下各蒙  
古番子並剛咱族野番等處貿易多年蒙古語番  
語伊俱會說與剛咱族策楞甲多利完第塔爾等  
交好結爲兄弟察漢諾們罕剛咱族汪什代克族  
素常搶劫各犯伊俱認識並稱伊於本年三月內  
曾經帶兵大人將伊帶出口外與官兵領路如蒙

差伊出口到察漢諾們罕剛咱族等處能將積慣  
作賊頭人拏來案下求恩典等情臣等以該犯熟  
悉口外各番情形不妨用作間諜令其出口在各  
番族處探聽倘真能將積慣搶劫之頭目拏案向  
其詳加跟究或可盡得底細該犯從前罪犯亦可  
量予末減適該犯之弟蘇起雲蘇起才並次子蘇  
四九子亦訪聞俱係私販常川出口之犯均經陸  
續拏獲到案隨飭將該犯家屬暫行監禁令該犯  
於是月二十八日起身出口去後嗣於十月二十  
八日始行回歸僅拏解察漢諾們罕旗下形跡可

疑之蒙古員南木等四人冀圖塞責銷差當向員南木等逐加研訊委無搶劫不法情事竟係妄拏無辜當將員南木等酌賞口糧釋放詰訊該犯供詞支吾總以未曾執有印票不能拏人爲詞正在研訊間據札薩克喇嘛察漢諾們罕呈稱本年十月內有漢人蘇誠將剛咱族番人多利等三十餘人領來聲言討取殺伊族人罰服因並未賠給隨一同轉回搶去察漢諾們罕蒙古隆本馬十四匹又搶去蒙古塔布緒等十四戶男婦共六十五名口並所養牲畜牛羊馬匹駱駝一併搶去等情當向

該犯嚴究並令跟隨察漢諾們罕之密楞喇嘛與該犯質對據該犯一一供認屬實並供出本年三月內令伊子蘇四九子與剛咱族通信卽跟隨該族多利逃往布哈河腦躲避又伊僱工馬朶滿拉現尙在剛咱族藏匿等情隨詳加研訊緣蘇誠係西寧縣屬丹噶爾回民年五十二歲生有三子早年卽跟隨伊父私出口外與蒙古番人交易伊父故後卽自行置辦炒麵茶葉川菸等物與伊次子蘇四九子並僱工馬朶滿拉出口與特禮貝勒暨察漢諾們罕旗下各蒙古番子並剛咱族野番處

交易每年一二次不等與剛咱族頭人多利族楞  
甲完第塔爾等處交好結爲兄弟遇有蒙古野番  
進口時該犯卽私當歇家容留居住爲其置辦口  
糧貨物本年三月內該犯令次子蘇四九子潛往  
剛咱族告知用兵卽同剛咱族多利等逃往布哈  
河腦躲避於六月內始行回歸七月內該犯復又  
置辦炒麵茶菸等物與僱工馬朶朶拉等出口至  
剛咱族多利帳房住歇易換羊皮等物於八月內  
回歸馬朶朶拉留住多利帳房收討欠賬九月十  
三日經該鎮等將該犯訪拏到案因該犯供稱素



習蒙番言語熟悉口外各番情形並稱能將積憤作賊之頭人拏獲等語當卽姑令出口作謀以觀後効詎該犯於九月二十八日起身出口十月初三日至察漢諾們罕營內聲言奉差拏人討要烏拉口糧卽於次日前往剛咱族與多利策楞甲完第塔爾等會過多利等向該犯談及察漢諾們罕殺其族人欲討罰服該犯卽慫恿前往多利等帶領三十餘人各執鎗刀軍器隨同該犯至察漢諾們罕營前聲言討取罰服察漢諾們罕以剛咱族亦曾殺其族人不肯給與該犯隨與多利等轉回

遇有搬家之蒙古隆木卽搶得其馬十匹復將蒙古塔布緒丹巴阿噶才楞等十四戶男婦共六十五名口並其收養牲畜馬牛等物一併搶回復囑令伊僱工馬朶滿拉仍卽在剛咱族躲避該犯轉回慮及難以銷差將無干之蒙古員南木等四人捉拏塞責於十月二十八日到案訊問該犯供詞一味支吾旋據察漢諾們罕呈明前情當向該犯嚴行質究據供前情不諱訊無另有不法別情查蘇誠積慣私出口外在蒙古野番處交易與剛咱族野番頭人多利等結拜並令伊子蘇四九子與

野番通信又令僱工馬朶滿拉在剛咱族潛匿種  
種不法本屬罪無可追該犯又將無辜之蒙古四  
人拏獲塞責復敢引惹邊蒙同剛咱族多利等往  
察漢諾們罕討要罰服搶劫其蒙古牲畜並戶口  
多人雖剛咱族與察漢諾們罕係屬互相仇殺惟  
該犯以內地民人與野番交結肆行搶劫勾通煽  
惑實屬罪不容誅臣於審明後卽將蘇誠卽行正  
法梟首示衆該犯之弟蘇起雲蘇起才子蘇四九  
子俱係私販出口應分別擬以軍流之犯照例咨  
部辦理逸犯馬朶滿拉仍飭緝務獲另結謹

奏奉

硃批所辦是知道了

道光二年十一月二十四日會同西寧辦事大臣  
松公廷

奏現在辦理漢奸約有三等其罪重者爲搶劫自應  
照強盜例治罪其次則私販私歇查私販各犯業  
經<sub>臣</sub>那彥成奏明按照人數分別擬以絞決充軍  
惟私歇例無明文該漢奸等於山僻小路開設歇  
家資夜招住野番代銷贓物易換糧茶情形較私  
販爲尤重及經獲案又恃無質証茹刑不吐<sub>臣</sub>等

公同商酌應請嗣後拏獲私歇家除審有不法重情實犯死罪外其但係在山僻小路經年累月開設私歇家者將爲首之犯照私通土苗例擬發邊遠充軍爲從之犯擬杖一百徒三年所有現獲各犯卽照此例嚴辦庶足以儆奸宄而靖邊陲謹

奏

道光二年十二月初七日奉

上諭那彥成等奏漢奸私歇例無明文著照所請嗣後西寧地方拏獲私歇家除審有不法重情實犯死罪外其但在山僻小路經年累月開設私歇家者將爲

首之犯照私通土苗例擬發邊遠充軍爲從之犯擬杖一百徒三年所有現獲各犯卽照此例嚴辦

道光二年十一月二十四日會同西寧辦事大臣松公廷

奏爲察漢諾們罕率屬悔罪請命願歸河南原牧現在押令渡河並妥爲清釐安插恭摺具奏事竊查察漢諾們罕一旗自移住河北以來始而窩賊繼而作賊漢奸又與之勾結因而蒙古與漢奸又復圖充搶掠相沿已久固結已深本年春間大兵進剿時該諾們罕貌爲恭順帶路運糧及撤兵之後

旋即四出搶掠雖未必盡出該旗而該旗既有搶掠之人則假冒者皆得藉以指名臣那彥成於抵滄後飭拏各處搶掠蒙古番子將陸續解到者嚴加審訊半係該旗之人或自行或冒充或勾結夥同卽近日拏到之漢奸賊首麻木溝盧生得等僉供與察漢諾們罕屬下人犯夥同作賊是該旗留住河北不但不能捍禦野番而且弊害無窮斷不可再爲姑息臣等前已將該旗糧茶與野番一體斷絕並諭令該諾們罕卽日速遷河南刻不准留方擬一俟明春開凍定當首先痛剿無遺隨經嚴

劄各卡監晝夜稽查毋許該旗蒙番等前來偷運口糧探聽信息匝月以來防守極爲嚴密

臣

那彥

成見事未到前次具奏尙稱待至來年春夏之交

必當窮蹙請命其時再行酌辦竟未料及該旗素

殊

可見窮蹙與辦理之效也

無積蓄甫斷糧茶卽已窮蹙立見實皆仰賴

殊

深爲可喜

皇上威福故得事機順利竟可不勞兵力該諾們罕向

因內地消息隨時可通糧茶又有漢奸爲之接濟

習見從前辦理番案不過勒令獻賊交贓可以數

衍了事卽此次禁絕糧茶亦不過虛言恐嚇終必

聽其飾詞籲懇仍然賞給是以心懷觀望及見各



處卡隘巡防既緊消息不通然猶挾其狡詐之習  
希圖朦混請糧始則託車林端多布暨尖巴里兩  
旗蒙古代爲購運經臣等查出飭將蒙古三丕勒  
等割去左耳並給與番子諭帖嚴詞切責示以勸  
期旋又生出奸計混入達什仲鼐蒙古旗內馱運  
青鹽來寧請票復經查出審究得實將該旗冒混  
之蒙古麻洛等十二名雙插耳箭各重責四十生  
馬貨物全行入官仍不准換糧茶經此兩次嚴辦  
該諾們罕計無復施乃敢率其屬下人等移近會  
亭游牧在其本意蓋不過思近內地冀如從前或

得漢奸私濟糧茶或可幸通消息但現經如此嚴  
辦不卽遠退尙敢向附近遷移行踪詭異正不可  
不防其叵測因卽密遣西寧鎮總兵穆蘭岱帶領  
兵弁七百餘名前往查勘情形卽與痛勦如有畏  
懼之意亦卽密稟候飭旋據該鎮以察漢諾們罕  
不意我兵卽至率衆出營跪迎認罪並自陳附近  
居住不敢別有意見惟冀得見一辦事大員懇求  
帶詣湟中親行謝罪已將該旗人戶業已陸續搬  
至河濱一俟冰橋結凍卽全行移徙各情懇請具  
稟前來

臣等再四斟酌該諾們罕旣已願歸原牧

悔罪自投並非招徠出彼至誠自應仰體

皇上好生之仁寬其一線因飭令准其前來西寧親見  
至日先令道府大員將該旗搶劫各案面加審詰  
該諾們罕不能置辭惟回顧左右不敢出言似有  
聽命於屬下不能自主情形臣等於次日先令諾  
們罕一人單見宣布

皇上德威中外震疊蠢爾番族不宜自外生成繼復詰  
其族內因何作賊身爲札薩克何以不能管束蒙  
番搜滋重罪一面嚴責一面開導據該諾們罕伏  
地碰頭回稱伊甫二十七歲向在西藏學經於去

年始管理旗務屬下人等固結已成事不稟承致  
令上干

天譴今蒙曉諭詳明方始醒悟情願率衆渡河仍回原  
牧剔除舊習冀以稍贖前愆惟伊所屬章京喇嘛  
把持已久又多非安分之徒實在力難制伏懇求  
代爲懲治等語其愧悔畏懼情形不覺一時聲淚  
俱下臣等察其詞意尙有可原亦卽申以勸懲布  
以恩信並諭將該旗戶口逐一清釐所有積慣作  
賊之人及藏匿該旗之漢奸責令查出擒獻其他  
族之依附居住者亦據實呈出於河北稽查旣確

卽於河南管束易周至屬下頭目人等既不遵奉  
約束自應重懲以示警戒當將跟隨諾們罕同來  
之圖薩拉克齊小完冲等重責鎖禁立卽斥革於  
次日又傳來面諭將該旗所管之二十族分爲左  
右兩翼照依該旗蒙古舊例設立圖薩拉克齊霍  
碩梅楞甲喇牛錄各章京撥什戶等每翼七員層  
層管束稽查並選擇誠實頭目另行充補該諾們  
罕曠若發蒙踴躍從命旋據將搶劫蒙古賊犯丹  
達勒納木都魯達哈巴等三名拏解到案當卽分  
別懲辦查該諾們罕人雖年輕尙屬明白易曉且

一接諭示卽將賊犯獻出尙知畏法其屬下作賊各犯皆由該章京等庇護縱容該諾們罕寶不能盡知卽有知覺其下已經固結該諾們罕亦不能自主是以姑且寬貸飭令卽回原牧並委署副將劉印景暨喇嘛乙喜多爾濟酌帶通事人等隨同前往押令渡河卽於河濱將該旗戶口清查其向來附居該旗者查明係何旗何族卽派兵弁押交該旗管領不許攜帶一人過河其勢旣分本旗亦無多戶口約計月底臘初定可掃數歸巢惟是渡河以後若非妥爲安插俾統束嚴明互相鈐制則

朝往暮歸勢必復來潛住且卽使久住河南原牧而復萌故智搶劫成風究非經久善策自來辦理番案皆謂驅逐過河卽已事竣殊不知南北番族卽係此輩且又遠接松潘近鄰洮岷循河倘令其漫無歸宿便於來去在循貴之蔓延固爲可慮而河北之遺孽總恐難消

臣等仰蒙

皇上委以重任不敢稍有粉飾希圖目下將就藏功現在分飭文武會同貴德廳營先將河南番族人戶清查一俟察漢諾們罕一經過河時逐細稽查造具清冊卽將所屬人戶核其實數照依番族式樣

添設千戶百戶及百總什總歸之圖薩拉克齊等  
官管束仍遵照議定易買糧茶章程一律辦理如  
先刷清於河北又編查於河南鈴束愈密則其勢  
散渙而易易似可少得制馭之要惟<sub>臣</sub>等智慮疎  
短未能自信周詳可否應如此辦理之處尙祈

聖明指示謹

奏奉

硃批不勞兵力不延歲月易於反掌甚屬可嘉之至另  
有諭旨

道光二年十二月初七日軍機大臣字寄奉



上諭那彥成等奏察漢諾們罕率衆悔罪願歸河南原收現押令過河並妥爲清釐安插一摺察漢諾們罕夥同野番勾結漢奸作賊已久此次經該督將糧茶斷絕立見窮蹙願歸原牧不勞兵力不延歲月易於反掌辦理認真甚屬可嘉之至該諾們罕旣已悔罪投誠自可寬其一線其屬下頭目人等向不遵奉約束自應加以嚴懲經該督將同來之圖薩拉克齊小完冲等重責鎖禁斥革並將該旗所管二十族分爲左右兩翼照該旗蒙古舊制每翼設員管束稽查擇誠實頭目另行充補其諾們罕獻出搶劫蒙古賊犯

丹達勒等三名業經分別懲辦並委署副將劉印景等押令渡河惟渡河以後必須妥爲安插俾統束嚴明互相鈐制令搶劫故智不敢復萌方爲經久善策不可將就戡事以致別滋事端

道光二年十一月二十四日會同西寧辦事大臣松公廷

奏爲審得爲首漢奸供出夥黨及該犯等盤踞窩巢現在嚴密查拏務盡根株並籌定巡防會哨及稽查山內各保甲章程恭摺具奏事竊臣等前據署永安營遊擊之都司周佐勝稟報拏獲漢奸首犯

麻木溝解赴西寧飭委道府等研訊所犯案件並  
窮究黨羽務盡根株當經隨摺附

奏在案道光二年十月二十二日准軍機大臣字寄  
十月初八日奉

上諭那彥成奏確查青海現在情形並酌安卡隘嚴拏  
漢奸一摺蒙古回民漢奸皆能爲番子衣冠始僅勾  
結鄉導繼或冒名肆行搶掠欲除外患自應先絕內  
奸此等回民熟番搶劫成風甚屬可慮那彥成所奏  
乃正本清源之道然必須辦理周密計出萬全以期  
一勞永逸不可稍有疎失欽此仰見

聖慮精詳幾先燭照不勝欽佩之至

臣

那彥成於武闡

事竣後卽於本月初三日馳抵西寧會同

臣

松廷

督率道府等嚴訊麻木溝一犯初據供出夥黨虎  
三米八張保娃趙牙信韓百林等係屬一同搶劫  
首犯臣以所供尙有不實不盡仍督飭道府將麻  
木溝熬審數晝夜始據供出李鬍子李二班楊大  
姜有才並木頭馬八等同漢民人共二十餘名俱  
係著名重犯又係同搶肅州馬厰案內之犯該犯  
等籍隸河州山丹肅州大通等處向在甘州之野  
馬川野牛溝一帶偷挖金沙牧放牲畜盤踞經年

不特搶劫並有銷贓之米滿拉丁四陳紹賢等亦在甘州永固城等處居住續經拏獲虎三米八張保娃到案俱供認夥同麻木溝搶劫屬實復供出夥黨岳升岳七馬花齊各犯正在剗飭緝拏間又據大通縣知縣應曙霞拏解首犯盧生得到案究出夥黨蒙古旺悟暨回漢奸民康大定康鳳卿康鳳濟等多犯搶劫各犯約十數餘起並有執持器械拒傷事主各等情現俱飛飭各該屬迅速嚴拏毋致漏網近年搶劫之多實緣漢奸勾結野番而漢奸究係何處之人以何人爲首其巢穴在於何

處其夥黨共有若干細加詢訪文武大小官員俱不能言之確鑿卽兩月以來各處拏解之砍家通丁奸商私販及蒙番搶劫各犯不下數十餘起核其情節祇係接濟口糧或臨時偷盜或過便行強並無聚集多人踪跡亦非不測雖該犯等貪利藐法罪在必懲而隱惡禍根尙不在此早夜思維總於查辦漢奸一事未得其要領因將現獲之麻木溝等嚴切跟究方知此輩奸民多在甘州之邊境野馬川一帶結黨盤踞該處毗連甘涼肅三府州南與西寧之大通接壤環山面河東西長徑四五

千里向係甘州肅州兩營馬廠地方遼濶其中之  
野牛溝八寶山等處產有金沙雖經查禁而利之  
所在奸民潛行偷挖糾合動輒數百聚散無常竟  
成盜藪連日就續獲各犯逐加嚴審其中最可駭  
異者該犯等偷挖金沙之餘導引附近蒙古並察  
漢諾們罕阿里克等族夥同搶掠始則尙係勾通  
繼乃僱覓甚且自行裝扮又有招聚蒙番婦女抱  
養番人之子以便其糾約竟有因此坐致富饒詰  
其搶劫時大半穿戴番衣番帽冒作野番騎馬持  
械疾捲長驅在被劫之家亦不知其爲何人何族

概目爲野番實則野番遠在二三千里之外或間有之亦十不一二伏查甘涼肅等處行旅絡繹實爲西路咽喉似此鴟張爲患日蔓月滋倘因循不究三五年後延及內地漸成尾大不掉之勢是腹心之疾更有甚於野番

臣那彥成仰承

硃

皇上指示於初來勘辦時卽認定先絕內奸爲籌邊要

台機宜朕甚悅焉

務決意追求不料旬日之間竟得窮其根底此時

若不盡力懲辦妥籌靖盜之方恐奸宄蔓延日久

竟不可問是地方公務但有一時一事少不經心

卽可釀成巨案言念及此實深凜惕至沿邊失察



殊

之文武大小官員本應特叅惟現當緝拏喫緊之

時若經嚴叅或因之迴護掩飾轉於捕務無益

是隨時據實辦理

等仍通飭諭如果遵行能獲要犯尙可功過相

抵若少有仍前因循立即嚴叅從重治罪現將素

甚是

座金沙之野牛溝等處全行封禁所有窩洞窩舖

概予填塞拆毀毋許容留一人居住仍令甘涼肅

西寧各提鎮輪按四季親身帶兵會哨每月仍各

派副叅大員帶兵搜查會哨每查一次專稟總督

稽核其各州縣近山以內之村堡環繞邊界居民

稠襍但係別省之人必皆圖挖金沙立即查拏若

係土著亦卽飭令地方官逐戶清釐編查保甲使之互相守望勿得藏匿匪徒道府大員按季親歷稽查造報總督以憑查核倘有視爲具文不實力辦理者立予嚴叅如此嚴密巡防俾內地奸民無從竄迹則假冒之習旣除勾引之路自絕卽再有扣劫各案其爲何旗蒙古何族番子亦易於分別不難立予擒拏庶邊圉可以肅清至麻木溝等犯現旣審究明確罪大惡極本應卽予駢誅以快人心而彰

國威惟尙有續行查拏之餘黨多人均須逐案質審

俾不得飾詞狡賴應將麻木溝等犯暫緩正法一  
俟各案犯質明後卽行辦理至現在漢奸回民勾  
串賊番爲害旣久情節可惡而關係邊務亦極  
大勢不可不從嚴懲治方足示儆其有不能盡按  
尋常律例者臣等仍當斟酌情罪隨案奏明請

旨謹

奏奉

硃批覽奏嘉悅之至卿能如此實心任事可謂不負委  
任矣另有旨

道光二年十二月初七日奉

上諭那彥成奏審擬漢奸盤踞務盡根株並籌定巡防  
會哨稽查山內保甲章程一摺首犯麻木溝經該督  
等嚴訊多在甘州之邊境野馬川一帶結黨盤踞其  
中之野牛溝八寶山等處產有金沙奸民潛行偷挖  
現據該督全行封禁窖洞簡舖概予填塞拆毀所辦  
甚是其麻木溝等犯供出夥黨除現獲各犯歸案辦  
理外卽飭屬迅速嚴拏務獲毋任漏網所有沿邊各  
察文武各官現當緝拏喫緊之時如能獲要犯尙以  
功過相抵倘仍前疲玩著卽嚴叅治罪其所請拔鎮  
副叅帶兵會哨道府州縣編查保甲俱著照所議行

至麻木溝等犯著暫緩正法俟續拏餘黨逐案質審  
再行辦理

那文毅公三任陝甘總督奏議卷五十六